


中
州
集

六



中州癸集第十一

溪南詩老辛愿 二十首

李講議汾 二十五首 李戶部獻甫 二十三首

司馬侍郎朴 一首

滕奉使茂實 八首 通理先生何宏中 一首

醉軒姚先生孝錫 五首

朱奉使弁 三十八首 蘧然子趙滋 一首

先大夫詩 四十四首

敏之兄詩 五首

三知己 溪南詩老辛愿

愿字敬之福昌人其大父自鳳翔來居縣西南女几山下以力田為業敬之自號女几野人年二十五始知讀書取白氏諷諫集自試一日便能背誦乃聚書環堵中讀之書至伊訓詩至河廣頗若有所省欲罷不能因更致力焉音義有不通者搜訪百至必通而後已有一事關十年者由是博極羣書於三傳為尤精至于內典亦稱該洽杜詩韓筆未常一日去其手作文有綱目不亂詩律深嚴而有自得之趣性野逸不修威儀貴人延客設之麻衣草屨足脛赤露坦然於其間劇談豪飲旁若無人高獻臣為河南治中聞其名引為上客及獻臣為府尹所誣敬之亦被評掠幾預一網

中州十一

一

之獨自是人以敬之之名為諱絕不與交不二三年日事大狼狽田五六十畝歲入不足一牛屢為追胥所奪竟賣之以為食衆雜嗷嗷張口待哺雅負高氣不能從俗俯仰迫以飢凍又不得不與世接其枯槁憔悴流離頓踣往往見之于詩元光初予與李欽叔在孟津敬之自女几來為之留數日其行也欽叔為設饌備極豐腆敬之放筋而嘆曰平生飽食有數每見吾二弟必得美食明日道路中又當與老飢相抗去矣會有一日辛老子僵仆柳泉韓城之間以天地為棺椁日月為舍穉狐狸亦可螻蟻亦可耳予二人為之惻然敬之佳句極多如自怜心似魯連子人道面如裴晉公萬事直須稱好好百年端欲付休休院靜寬留月窻虛細度雲浪翻魚出浦花動鳥移枝之類恨不能悉記耳

木杓云今感醉几秋風晚只許幽人箇裏知
三野光武廟云方山青遠一川斜對其處

如鷓予嘗論敬之士之有所立必藉國家教養父兄淵源師友講習三者備而後可喻如世之美婦多出於膏腴甲族薰醲含浸之下閭閻闕非無名色一旦作公夫人則舉步羞澁曾大家婢不如其理然也故作新入材言教育也獨學無友言講習也生長見聞言父兄也至於傳記所載西子乃苧蘿山采薪氏之女越君臣教之容止七日而納之王遊能感夫羞

吳國豈常理也哉敬之落落自拔耿耿自信百窮而不憚百辱而不沮任
重道遠若將死而後已者三十年亦可謂難矣南渡以來詩學為盛後生
輩一弄筆墨岸然以風雅自名高自標置轉相販賣少遭指撻終死為敬
一時主文盟者又皆汎愛多可坐受愚弄不為裁抑且以激昂張大之語
從史之至比為曹劉沈謝者肩摩而踵接李杜而下不論也敬之業專而
心通敢以是非白黑自任每讀劉趙留李張杜王麻諸人之詩必為之探源
委發凡例解絡脉審音節辨清濁權輕重片善不掩微類必指如老吏斷
獄文峻網密絲毫不相貸如衲僧得正法眼徵詰開示幾於截斷衆流人
有難之者則曰我雖不解書曉書莫如我故始則人怒之罵之中而疑之
已而信服之至論朋輩中有公鑒而無姑息者必以敬之為稱首蓋不卒
於教育不階於講習不出於父兄而卓然成就如此然則若吾敬之者真
特立之士哉

亂後

劉景文通宜之雷希頌李欽叔
張仲經杜仲梁王仲澤麻知微

兵去人歸日花開雪霽天川原荒宿草墟落動新煙困鼠鳴虛壁飢鳥啄
廢田似聞人語亂縣吏已催錢

口州一

八二

贈趙仲常

名適字之從家詩有黃塵衣袂
塵隨脚履蕭蕭老屋頭之句

童子年雖小論詩樂最深秋風凡幾首冬日更多吟老大吾無力文章
用心荒山松竹底莫厭數相尋

過崧山

懼老年光奈衣來好懷知欲向誰開箕山潁水春風裏呼起巢由共一
杯

隆德故宮

蛇分鹿死已無秦五十年來漢苑春問着流鸞無一語柳條依舊拂牆新

同趙長水汎舟

洛水秦山晚自澄孤洲煙樹綠相仍波搖朗月浮金鏡嶺隔華星斷玉繩
但覺轉船驚白鳥豈煩揮翠翫青蠅風塵浩蕩飄蓬裏愧似林宗陪李膺

山寒

山寒春靜早闌門新月微光照短垣可恨暮雲堪落景却將殘靄助黃昏

陋室

陋室何妨似燕窠暮年終得返魚簑壺中日月時常好枕上功名不足多
往古來今真夜旦高天厚地一且羅鹿門幸有龐公樂牛角徒為竊戚歌

亂後還三首

其戈爲客苦思鄉春暮還鄉却自傷典籍散亡山閣冷松筠憔悴野園荒
鷺銜晚色啼深樹燕掠春陰入短牆鄰里也知歸自遠賤將言語慰寒涼
亂後還家春事空樹頭無處覓殘紅棠梨采雪露新兩揚柳鴈錦鴨晚風
談笑取官驚小子艱難爲客愧衰翁殘年得見休兵了收拾躬身守桂叢
春來漂泊心情減老去艱危氣力微芳草際天愁思遠干戈滿地故人稀
懷金躍馬時何有問舍求田事已違糲食弊衣聊自足白頭甘息漢陰機

題游彥明林園三首

先生未老厭儒冠築屋栽籬守歲寒經史日長常滿棧魚蝦溪近得供盤
幽花入室無多種瘦竹閑情只數竿蕭洒遠辭車馬跡求官何必近長安
城郭繁華斷往還林園幽閑養高閑花徑煖藥斜窺水竹亞晴梢巧避山
尊俎歲時君得意風埃南北我何顏丹房藥鏡游心久不惜哀矜洗病孱
不噴適看冷翠微儘教叢竹映窻扉籬根傍水知魚樂屋角隣花鳥自歸
獨酒野片安已父華軒高馬到從稀人間回首皆堪鄙羨汝幽棲得所依

贈劉詹主劉遼貴族

登薄軒裳貴高尋綺皓蹤一囊閭里藥六尺水雲筇午枕眠芳景晴捲墨
遠峯茶門常不掩應得野夫從

函關

雙峯高聳大河旁自古函關一戰場紫氣久無傳道叟黃塵那有奔縵郎
煙迷短草秋還綠露泫寒花晚更香共說河山雄百二不堪屈指算興亡

贈趙宣之二首

夫子今詞伯胡爲遠帝京青雲無轍迹白髮有柴荆鬼戲多年病人高四
海名麟經方有缺無惜繼立明

轉徙家無地逢迎客有樽光陰連病枕天地一愚軒霜雪青松古風塵白
壁溫從渠投隙者寥寥向金門

送裕之往許州酒間有請予歌渭城煙雨者因及之

白酒留分袂青燈約對床言詩真漫許知己重難忘爽氣虛韓岳文星照
許昌休歌渭城柳衰老易悲傷

寄裕之

青雲一別阮家郎其欲題詩遠寄將好句眼前常踉蹌過佳人心上不曾忘

誰家秋月茅亭底何處春風錦瑟旁
昌谷煙霞久寂寞歡游還肯到三卿

山園

歲暮山園懶再行
蘭衰菊悴頗關情
青青多少無名草
爭向殘陽暖處生

李講議汾

汾字長源平晉人系出雁門曠達不羈好以奇節自許避亂入關京兆尹子
容愛其才招致門下留三年去之涇州謁張公信甫一見即以上客禮之自
是海道日廣然關中無一人敢與相軒輊者元光末用薦書得從事史館
舊例史院有監修宰相為之同修翰長至直學士兼之編修官專纂述之事若
從事則職名謂之書寫特抄書小史耳凡編修官得日錄分受之纂述既定以
彙授從事從事錄索本呈翰長平居無事則翰長及從事或列坐飲酒賦
詩一預史事則有官長據屬之別長源素高亢不肯一世乃今以斗食故人
以府史畜之殊不自聊高張諸人率以新進入館史家凡例或未能盡知勢
其所長且不滿長源一笑故刊修之際長源在旁則蓄縮慘沮握筆不能下
長源正襟危坐讀太史公左立明一篇或數百言音吐洪暢旁若無人既畢
顧四坐漫為一語云看秉筆諸人積不平而雷李尤所切齒乃以嫚罵官長

命判

八四

訟干有司然時論亦有不直雷李者故證左相半踰年不能決右丞師公以
傷風化為嫌遣東曹掾置酒和解之不得已乃罷尋入關明年駢數馬來京
師日以馬價佐歡道逢然家則盡地大數而去又明年恒山公仙在鄧之西
山長源往說之署行尚書省講議官既而恒山與參知政事思烈相異同頗
謀自安懼長源言論欲除之迫之泌陽竟為所害長源孝友廉介過人者甚
多寧寒餓而死終不作寒乞聲耳向人人亦以此愛之平生以詩為專門之學
其所得為尤多如洛陽才子懷三策長樂鍾聲又一年清鏡功名兩行泪浮
雲親舊一囊錢煙波蒼蒼孟津渡旌旗歷歷河陽城長河不洗中原恨趙
括元非上將才三輔樓臺失歸燕上林花木怨啼鴉空餘一掬傷時淚暗
墮昭陵石馬前同輩作七言詩者皆不及也辛卯秋過予襄城盃酒間諷
關中往來詩十數首道其流離世故妻子彫喪道塗萬里奔走狼狽之意
雖解首危苦而耿耿自信者故在鬱鬱不平者不能拚清壯磊落有幽并
豪俠歌謠慷慨之氣此詩兵火中散亡今就其少作予所能記憶者錄之

陝州

黃河城下水澄澄送別秋風似洞庭李白形骸雖放浪并州豪傑未凋零

十年道路雙蓬鬢萬里乾坤一草亭八月峻陵霜樹老傷心休折柳條青

州北

州北光風艷綺羅南來雁從此人多梨園法曲懷奴舞月窟新聲倩女歌
紫禁衣冠出金馬青樓阡陌瞰銅駝薄游却憶開元日常逐春風醉兩坡

再過長安

細柳斜連長樂坡故宮今日重經過一時人物存公論萬里雲山入浩歌
白髮歸來幾人在青門依舊少年多自怜季子貂裘敝辛苦燈前讀揣摩

汴梁雜詩四首

天津橋上晚涼天鬱鬱皇州動紫煙長樂解鞍青似染建章馳道直于絃
犬牙磐石三千國聖子神孫億萬年一策治安經濟了漢庭誰識賈生賢
琪樹明霞五鳳樓夷門自古帝王州衣冠繁會文昌府旌戟森羅部曲侯
美酒名醞陳廣座凝笳咽鼓送華新秦川王粲何為者憔悴蒿廬坐白頭
樓外風煙隔紫垣樓頭客子動歸魂飄蕭蓬鬢驚蒼色狼藉麻衣宛酒痕
天塹波光搖落日太行山色照中原誰知滄海橫流意獨倚牛車哭孝孫
寥落關山對月明客寓遙夜夢魂驚二年以下音書絕八月河南風露清

州北

五

蕪苒暮愁生草色迢迢秋思入蟲聲誰知廣武英雄嘆老却窮途阮步兵

上清宮三首

憶昔秋風從茂陵詞臣忝預漢公卿瑤池宴罷西王母翠輦歸來北斗城
石馬嘶殘人事改劫灰飛盡海山平唯餘太一池邊月伴我鷗鷺上玉京
蒼梧雲氣赤城霞綿絡鈞天帝子家仙掌高承九霄露霓旌遙駐五雲車
昆明火劫驚人世瀛海風濤撼客槎醉裏忽逢王子晉玉笙吹上碧桃花
千劫塵緣謝吏曹道山仙闕事遊遨樓臺縹緲滄溟闕官殿森羅紫極高
幾代雲孫接仙李千年王母醉蟠桃詩成便欲還山去猶待君王賜錦袍
避亂陳倉南山回望三秦追懷淮陰侯信漫賦長句

憑高四顧戰塵昏鷓野山川自吐吞渭水波濤喧隴阪散關形勢軋興元
旌旗日落黃雲戍弓劍霜寒白草原一飯悠悠從漂母誰怜國士未酬恩

雪中過虎牢

蕭蕭行李夏弓刀踏雪行人過虎牢廣武山川哀阮籍黃河襟帶控成皋
身經戎馬心逾壯天入風霜氣更豪橫槊賦詩男子事征西誰為謝諸曹

清明

鳴珂振袂滿重城春日綿綿老燕鳴人在碧雞坊外住澹隨流水過清明

下弟

學期攻書謾自奇回頭三十六年非春風萬里衡門下依舊并州一布衣

磻溪

封侯輸與曲如鉤冷坐磻溪到白頭老婦厨中莫彈缺白魚留待躍玉舟

感寓述史雜詩五十首并引

正大庚寅子行年三十有九獻賦明廷為有司所病遂有不遇時之嘆阜衣巾食從事史館以素非所好愈鬱鬱不得志臥病中僻居蕭條盡日無來人緬維先哲凡所以進退出處之際窮達榮辱之分立身行道建功立事閱諸人事者竊有所感焉於是始自騷人屈平以來下逮漢晉隋唐諸公終之以遠祖鴈門武皇作為述史詩五十首以自慰其羈旅流落之懷述近代則恐涉時事故斷自唐以下不論嗚呼三百篇大抵皆聖賢感憤之所為作也余以愚忠謬信獲譏于斯世久矣非敢示諸作者庶幾後世有揚子雲者出或能亮予之宿心是歲秋七月既望并州人李汾引

蘇客卿秦

口州一

六

游說諸侯獲上卿賈人唇舌事縱橫可憐一世癡兒女爭羨腰間六印榮

韓淮陰信

杖劍淮陰去復還舉頭西望識龍顏堂堂竟握眞王印未害男兒辱膝關

叔孫奉常通

秦時博士魯諸生漏網驢山百丈阮邂逅劉郎習錦蕪便能彈壓漢公卿

馬中令周

脚踏長安陌上塵布衣西上欲誰親君王不省常何策憔悴新豐一旅人

遠祖鴈門武皇

死心唐室正諸侯鐵馬南來隘九州當日三垂岡上意諸孫空抱腐儒羞

擬張水部行路難

洛陽行人心欲折半年西州信音絕彈箏峽口兵塵高半夜心懸隴山月君不見嗷嗷失羣鳥泪盡眼流血潼關書閉漢使稀安得慰我生離別

雲溪曉泛圖

曉景淡明月落影潭西丘晴川挂煙樹光拂雲河流楓林入行色關山生白頭羨羨畫中人憶我秦川游君帆那何許憐下滄浪洲浪吾有釣竿

謝同盟

古月一篇為裕之賦

古月天不收敵君三萬秋天孫弄明鏡光鴻雲間流憶昔放逐江南州金陵女兒歌權謳草裏烏紗巾散着紫綺裘酒酣托玉笛直欲捫參歷井騎汗牛醉中呼兒搗雙舟吾欲乘流下石頭起來茫茫視八極萬里只有元丹丘丹丘子游人間風塵何為往復還玉華山人近招我九日朝帝蒼梧

西歸

擾擾王城足是非不堪多病決然歸只因有口談時事幾被無心觸禍機日暮豺狼當路立天寒鷓鴣傍人飛終南山色明如畫何限春風笋蕨肥

避亂西山作

三月都門晝不開兵塵一夕捲風回也知周室三川在誰復秦庭之日哀鴉啄腥風下陽翟草銜克血上琴臺夷門一把平安火定逐恒山候騎來

李戶部獻甫

獻甫字欽用欽叔從弟也兄欽止欽若皆中朝名勝家故將種而同時四

八口

七

進士人門之秀照映一時欽用博通書傳於左氏及地理之學為精為人
有幹局心所到則絕人遠甚故時人有精神滿腹之目歷咸陽簿辟行臺
掾屬正大初夏人請和朝廷以馮子駿往議欽用預行夏使有口辯焉善
人無以折之往復之際至以歲幣為言欽用不能平從旁進曰夏國與敵
邑和好百年今雖易君臣之名而為兄弟之國使兄而輸幣寧有據耶曰
兄弟且不論宋日曾與吾家二十五萬疋典故具在君獨不知耶金朝必
欲修舊好非此例不可欽用作色曰使者尚忍言耶宋以歲幣餌君家而
賜之姓岸然以君父自居夏國君臣無一悟者誠謂使者當以為諱乃今
公言之使者果能主此議以從賜姓之例敝邑雖歲指五十萬某請以身
任之夏使語塞和議乃定使還朝廷錄其功授慶陽總帥府經歷官尋辟
長安令京北行臺所在供須之繁急于星火欽用所以處之者常若有餘
將民賴之以安入為尚書省掾壬辰之兵奏充行六部負外郎守備之策
時相倚任之以功遷鎮南軍節度副使兼右警巡使車駕東巡死于蔡州
之難時年四十所著詩書文號天倪集者留京師欽用死其家亦破非同
年華陰王元禮購得之幾有人琴俱亡之恨然則文字言語之傳與否亦

有數存於其間耶

夏夜

銀潢淡淡沒疎星一陣涼從雨後生仰看浮雲成獨卧數圍蛛網絡中庭

九龍池春望

五年外地看清明袖手佞回過客亭謝絮楚萍無定着春光如我更飄零

興慶池書所見

短短蒲菰刺水青翠萍開處鑑波明畫船轉過垂楊外水面風來聞樂聲

題黃華幽居圖

層層佛屋貼山腰山下幽居勝午橋物外人家無稅役閑中生理足漁樵
鴈踰遠障凌虛迥人與高秋共寂寥何處人間景如此便應歸隱不須招

長安行

長安道無人行黃塵不起生榛荆高山有峯不復險大河有浪亦已平向
來百二秦之形穢今百二秦之名我聞人固物乃固人不為力物乃傾將
軍誓守不誓戰戰士避死不避生殺人飽厭敵自去長安有道誰當行黃
塵漫漫愁殺人但見蔽野雞羣鳴河東游子淚如雨眼花落日迷秦城長

口州一

八

安道無人行長安城中若為情

別春辭

東皇按轡來何遲人間二月才芳菲六十日春能幾時不如意事常相隨
一聲啼鴉花片飛把酒却與春別離春緩歸聽我歌滔滔歲月如流波貴
屢執與賤樂多吾寧不欲列華鼎馳鳴珂香屏倚妓薦綺羅人生賦分有
定在誰能買愁費天和長安市上酒如海跨驢徑上胭脂坡酒酣醉舞步
婆娑春自來去如予何

秋風怨

疎星耿耿明天河夜涼翠幕生微波碧梧委葉傳金井一夕秋風將奈何
春風令人和秋風感人悲妾愁自與秋風期秋風爭管人別離燈地垂紅
粉泥暗龜甲屏風雲影亂絡緯弔月啼不斷蓮漏壓荷夜未半涼風蕭蕭
入疎竹枕底寒聲碎瓊玉敲愁撼睡睡不明花露盈盈泣魚目秋風且莫
吹念妾守空闈嫁狗隨走雞隨飛九死莫作蕩子妻郎薄倖妾薄命花自
無言絮無定碧雲暮合郎未歸幾度粧成掩明鏡

河上之役三首

河堤一決豈天窮失在當年固白公誰與麻岡開故道雙紋版籍見山東
新築河堤要策動萬人採淨北壩新青骨好借曹州柳舊是中原一段春
曹隆叔已父

萬夫卷土障橫流負土成山水未收明日落成真盛事誰能作賦擬黃樓

圍城

碧樹蒼煙起暮雲長安陌上斷行人百年王氣餘飛觀萬里神州隔戰塵
身與孤雲向雙闕愁隨落日到咸秦山河大地分明在莫為時危苦愴神

驟雨

龍戰雲雷擁日囚鞭驅雷電走蛟虬望中雨脚橫天落觸處湍聲卷地流
梁苑樓臺失炎暑漢家城闕動高秋若為借得天瓢去倒瀉明河淨九州

資聖閣登眺同麻杜諸人賦

高閣凌雲眼界寬野煙碧樹有無間天邊孤鳥飛不盡陌上行人殊未還
魏國幾回時事改汴堤千古夕陽閑愁來重倚欄干望崧少西頭是故山
南冠五人 司馬侍郎朴

朴字文季溫公之猶子宋兵部侍郎以奉使見留居于祁陽授以官託疾

中州

九

不拜遨遊王公之門以壽終文季工書翰有晉人筆意興陵萬機之暇嘗
購其遺墨學之有雪霽同韓公度登圓福寺閣和李効之詩今略載于此
積雪日出杲雪飛梅已殘朋游要及時閣鄰有遐觀乘此蕪穢平快覽天
宇寬霽色混銀界曠望連江山如白毫相滉溢清揚端一氣轉浩渺萬
里皆瀾漫優哉賦梁苑想像排廣寒此下不可讀當俟善本考之

無餘居士齋壁有沈傳師游道山岳麓詩石刻穆仲等和之

因亦次韻

湘西勝景豈易論群山騰闖萬馬奔鶴泉一菴騫鵬鳴松風十里藏祇園
當時侍御偶題寫筆力孰敢爭雄尊東京少年妙詞藻南陽舊族齊陰樊
天心月脇出奇語使我展讀忘朝昏差差戈劍隱一斂落落旗鼓嚴千屯
無餘居士厲幽志細研六藝芳專門凍骨嬌兒慣腸其啼飢瘦婦餘淚痕
惟君德義允相愜每窮道妙角與根他人勸酒驚逐塊二子頻酌勤空樽
醉中詩成渺江海風外幘影徒飛翻卷藏篋笥已戢戢風生襟袖何軒軒
嗟乎我亦有餘腐歷哉羊政囚華元

滕奉使茂實

茂實字秀穎姑蘇人初名裸徽宗改賜焉以太學正兼明堂司令與樞密
路允迪翰林修撰宋彥通奉使割三鎮太原尋奉密詔據城不下國相怒
囚使人於雲中欽宗北遷秀穎謁見涕泣請從行主者不之許放允迪彥
通南歸茂實留鴈門與兄宗正丞福祥伯淮南發運使荷共居久之家人至
自汴梁秀穎往來并代之間布衣終身臨終令黃幡覆尸而葬仍大刻九
字云宋使者東陽滕茂實墓士大夫哀其忠爲之起墳於鴈門歲時致祭
好問兒時先大天教誦秀穎臨終詩然亦僅能記末章數語而已庚子春
自山東還鄉里值鄉先生鴈門李鍾秀共求秀穎詩文鍾秀云喪亂以來
家所藏書焚蕩都盡避兵山中民家偶於破箱中得秀穎詩一編帝已敗
爛前序秀穎自作可辨者百餘字大略言能安於死生之分而不能忘感
繫不平之氣又曰蘇屬國牧羊海上而五言之作自此始予敢援以爲例
後敘是筆吏林泉野老彥古彥古年七十八手錄三勝始末號東陽滕秀
穎鳳山思遠記者詩數百首可讀者什六七臨終一詩缺三五字而已非
筆吏此集則秀穎之事無以見於世予意先生名節凜然不愧古人其文
字言語宜有神物護持雖埋沒之久而光明發見使有不可掩焉者因備

口州一

述于此亦使彥古之名託之而不腐云精字彥古當作備

哀隆德守臣張確確浮休張舜民之弟嘗爲烏疑師幕獨不
廷謁童貫作詩吊之

睢陽萬古一張巡忠義傳家有世臣顏子伏膺嘗入室潘郎望拜肯同塵
圍城已陷天猶晦仗劍臨危氣益振餘子鄰邦盡替李偷生端作九泉人
天寧節有感

節臨重十慶天寧古殿焚香祝帝齡身在北方金佛剎眼看南極老人星
千官花覆常陪燕萬里雲遙阻在廷松栢滿山聊獻壽小臣孤操亦青青
亦梁故老云徽宗本以五月五日生以介
足後之十月十日故此詩有重十之句

雨後蔬盤可喜偶成

過雨盤蔬日日新從今休嘆庾郎貧寒藜安取咄嗟辨火食不憂生死隣
野莫何施雖可鄙美芹欲獻去無因干戈萬里風塵晦慙媿平生肉食人
五日

節物驚心動遠思薰風又見浴蘭時空尋好句書紈扇無復佳人繫綠絲
酒注菖蒲唯欲醉筒包菰黍不勝悲明年此日當何處風裏孤蓬自不知

言兩

早暎雨澗溼豐稷都不疑問于應屢舞布穀強多知龍見寧非數雲行自
有時當年班夏令曾得近丹墀

偶成

纖雲卷盡見秋容古木交陰一掃空雪壓羣山曉來雨葉侵欂櫨幾番風
欲歸未得人將老屢送還來鬼亦窮賴得子卿佳傳在整冠時讀慰飄蓬

立春

東皇布政物皆春山色禽聲便可入滿谷和風消積雪平窓晴日動游塵
宮花插帽枝枝秀菜甲堆盤種種新拘窘經時成土俗聊從一醉適天真

臨終詩并序

△奉使亡狀不復反父母之邦猶當請從主行以全臣節或怒而與之死
幸以所杖節櫛裹其尸及有篆字九爲刊之石埋於臺山寺下不必封樹
蓋昔年大病夢遊清涼境界覺而失病所在恐于此有緣如死窮微則乞
骸骨歸悉如前請預作哀詞幾于不達方之淵明則不可亦庶幾少游之
遺風也

中州十

十一

蕪菴益老書生謬列王都官索米了無補從事敢辭難殊隣復臨好杖節來
榆閔城守父不下川涂望漫漫儉藜東不惜一往何當還牧羊困蘇武傳
道拘張騫流離念窮東坐閱四序遷同來悉言歸我獨留塞垣形影自相
吊國破家亦殘呼天竟不聞痛甚傷肺肝相逢老兄弟悼歎安得躡波瀾
卷大厦一木難求安就不違我心渠不汗我顏昔燕破齊王群臣望風奔
王蠋猶守節燕人有甘言經首自絕胆感集今昔聞未嘗食齊祿徒以世
爲民况我祿數世一死何足論遠或死江海近或死朝昏歛我不須衣裹
尸以黃幡題作宋臣墓篆字當深刊我室尚少女兒女皆童頑四海無置
錐飄流倍悲酸誰當給衣食使不厄飢寒歲時一醉我猶足慰我魂
亦悠悠異鄉寄沉寃它時風雨夜草木號空山

通理何先生宏中

宏中字定遠先世居鴈門叔祖青出武弁任忻州兵馬使因家焉祖行宣
西遊遇仙不返行宣之子子奇子霖政和中中武舉高科子奇秉義即武
州宣寧尉子霖忠翊郎守豐州安豐皆沒王事定遠子奇子也幼個儻
儀觀秀整雅以奇節自許宣和末方賊擾江浙定遠以太學武舉進士陳

破賊三策徽宗褒諭謂非近日言學者所可比已而破賊如定遠策遂知名宣和元年集英殿試策中第二調滑州韋城尉汴京被圍州郡多避走獨韋不下兵退統制武漢英奏辟欽宗御札召赴軍前以臨塞不果因請兵真定宣撫司時副帥种師中兵已潰宣撫司檄定遠副漢英守銀冶路既而太原破西路無完城定遠等提兵並山而東將赴援京師俄漢英戰死定遠收合散立立山棚七十四所號令所及千里而遠艱食數月人不致相食詔以為武衛大夫河東河北兩路統制接應使是後國朝兵日盛所守唯銀冶一城而已帥府募人生致定遠天會五年二月糧盡被擒大帥昭刺憐其忠解縛授以官定遠投牒於地曰我常以此物誘人出死力若輩乃欲以此嚇我耶帥嘉其不降屈又問欲還鄉否定遠謀南奔陽以願歸為言會盛送使臣有先與定遠相攻劫者趙之囚西京府君廟二年帥一日召之授以官又不拜使之充軍亦不從取家屬填城黃龍府益偃蹇不行帥怒褫衣欲斬之定遠欣然就戮曰得死所矣擁之行已數十步帥終不忍召還問爾授官不願充軍又不行填城又不行斬又不懼畢竟欲如何定遠徐曰生死在公奚問為帥怒解繫之西京獄得州人保任者

口州一

一一一

數十族乃放歸請為黃冠時神霄宮廢道士舊以徽宗為東華君將毀其像定遠為起紫微殿遷像事之年六十三正隆四年病歿自號通理先生所著成真通理二集藏于家州將傅慎微幾先贈詩云故人何定遠造物不虛生骨路稜稜瘦詩篇字字清世皆尊道孰我獨見忠誠尊酒分携後何時蓋後傾其餘與朱少章輩唱酬甚多皆為所推重載之墓碣之陰

沐懷

馬革盛尸每恨邊西山餓踏更何辭姓名不到中興曆付與皇天后土知

醉軒姚先生考錫

孝錫字仲純豐縣人政和四年登科調代州兵曹國朝兵入鴈門州將議以城降官屬恇怯投死無所仲純投床大駭略不以為意帥府就注五臺簿未幾移疾去因家五臺善治生亭榭場圃富於遊觀賓客日盈其門州境歲飢出家所藏粟萬石振貧之多所全濟鄉人德之中年之後以家事付諸子放浪山水間詩酒自娛醉軒其自號也資稟簡重喜怒不形于色奔官時年二十九至八十三乃終名士大夫為詩以吊者數十人先生長于尺牘所著雜助集喪亂以來止存律詩五卷而已今略載於此以冠鄉

云節物後先南北異人情冷暖古今同次趙獻之韻云紅纈退風花着
子綠鉞淨水稻抽秧溪墅早春云夕客交情諳冷暖衰年病骨識陰晴春
日和德充云煙染綠絲迷別浦雨催紅糝綴長條新詩云愁邊日晏偏疑
短夢裏江鄉未嘗歸盤無蕪味新留客夢厭多歧不到鄉賦雪云酒敵餘
威翻索寞詩含幽思倍清新雨云岸漲魚吹沫山空石轉雷雪云舞風初
學絮帶雨不成花峯山寺云谷虛繁地籟境寂散天香雲生古木千章秀
山抱晴川一掌平懷士會云詩忙踈酒醜俸薄減厨煙感懷云玄晏暮年
常抱病予山終日苦思歸古詩尤有高超恨不復見之矣
中司經子老河東與先生一夢空山林得命長何日非聲通相公
風立香煙光生有道四聖開此心命長何日非聲通相公
地是前香高平李仲文此山飛嶽著清骨無寒容非
雲松影前香高平李仲文此山飛嶽著清骨無寒容非
志三徑尚存元亮菊五湖空自子皮舟王元氣云夫子人
德律日收得自官身也管不吝百道竟頭陳發書占買
德律日收得自官身也管不吝百道竟頭陳發書占買

生涯甘分寄耕桑山色圍門水遶墻困病夕懲耽酒癖愛閑猶有和詩忙
蒼冰滴砌春猶冷野馬浮川日漸長舊事老年多記憶故園歸夢正悠
柳溪別墅

安車隨意飽甘肥晚食徐行理亦齊山雨日高人未集柴門客至鳥先啼
溪橋散望携笻屐野寺牽吟信筆題容膝易安聊自適危天閑看舞醜雞
歲晚懷二弟

少易成歡老易傷壯遊垂白未還鄉煙塵無復音書到魂夢猶疲道路長
幾竹又驚新薦歲屠蘇空憶舊傳觴年年此日遙相憶鴻鴈何時續舊行

山口一
一三

睡起

睡起日侵牖，開軒遙見山。曉風吹牖盡，芳草惹春還。煙暖鸞鴛逸，谷雲仙鶴
渡。閑衰年人事，減過酒得開顏。

次李平子登臺有感韻

落日孤雲帶遠岡，成樓煙瘴舊邊場。疲民卒歲方懷土，遠客憑高自憶鄉。
漢使一朝延四皓，秦詩千古吊三良。行藏此意無人解，聊借青山送酒觴。

九日題峰山

不須歌吹上叢臺，千里晴川入座來。世事難憑休挂口，生涯見在且銜盃。
無情趁暖花先老，有信迎寒鴈已迴。遙想故園親種菊，霜枝露葉向誰開。

次韻王無競見寄

客懷重倚仲宣樓，白草黃雲塞上秋。山色不隨塵世改，水聲還抱故城流。
陳中畏景那堪玩，鏡裏衰顏祇自羞。多愧詩人苦相憶，遠傳佳句吊清愁。

閉居

無客訪衰殘，柴門盡日閑。耽書真是癖，惜酒近成慳。苔徑行搜句，茅簷
看山却嫌明。鏡裏偏照鬢毛斑。

中州十

六十四

和成冠卿見寄

別恨頻添曠雪深，百年懷抱鬱沉沉。標名不挂金銀榜，涉世空堅鐵石心。
俗物何勞供一醉，殘僧正欲伴孤吟。朱絃三弄虛聲寂，唯有清風是賞音。

次韻秋興

老畏年光速，愁添旅夢多。西風著梧竹，歸思入煙波。夜永憑詩遣，顏衰得
酒和。故溪千樹柳，誰復曠漁蓑。

感白髮

鬢缺憑誰聽，客歌震雷那。復化魚梭梳，頭白雪驚新。有障眼玄花，比舊多
。病體阻兵猶斷絕，壽懷邁酒暫消磨。不須更問今朝客，門外元無雀可羅。

曉霽

一夜雲峯卷，迅雷殘紅狼藉點。蒼苔翠鳥深，豈解留春住。燕語虛勞喚夢迴，
。終寂頓疑詩思減。衰殘偏感歲華催，柳溪魚鳥應相識。乘興無嫌日日来。

重九偶成

天邊今日又重陽，籬樹紅飛雁信霜。且插茱萸慰衰鬢，莫將詩句撓回腸。
。歡動皓齒人俱醉，舞應晴暉蝶也忙。來日預期扶宿酒，未應籬菊減秋香。

溪橋早春

輕黃未染柳梢勻，連日溪風卷塞塵。乍暖乍寒花信晚，相呼相應鳥聲頻。
少勤謾挾經綸策，老懶空餘病恙身。追憶故園桃李樹，年年紅紫爲誰新。

東軒琴示兒子沂

古人無復見，但有東軒琴。一鼓高山操，因窺古人心。正聲久沉埋，俚耳喧
哇淫。正可自怡悅，不須求賞音。

花前獨酌二絕句

老將花酒作知音，起就花前酒自斟。莫便興來先酩酊，却妨真賞廢搜吟。
移得名花手自栽，花知不爲老人開。興來誰是樽前客，唯有提壺送酒盃。

題柳溪別墅

雨霽風和，不動塵沙。遊携酒賞，晴春頗來。溪鳥渾相識，渡水穿花不避人。

芍藥

綠萼披風瘦，紅苞浥露肥。只愁春夢斷，化作彩雲飛。

次韻李相公偶成

簾鳥喚歸夢，竹風送夕涼。感時空有淚，却老分無方。流水依山白，孤雲帶

山口川

八十三

日黃無人共，樽酒散髮卧。藜床

村居偶成

靜愛柴門野興幽，杖藜徐步到岩丘。深林有獸爲先噪，廢圃無人泉自流。
土瘠稅租隨力辦，年豐禾黍過時收。客來不慮無供給，白酒黃雞亦易求。

用峯山舊韻

舊步西風寺第幽，未覺餘松根纏石。瘦雲磴出岩斜，思爽餘三唱詩成自
一家空餘幾兩屐，不踏溪橋

春水上堤。沙春晴散望，餘衰年花近眼。久客夢還家，映日孤鴻沒。迎風双

燕斜平生江海意，早晚送浮槎。

題佛光寺

撼轂雖殊竟兩亡，倚欄終日念行藏。已忻境寂洗塵慮，更覺心清聞妙香。
孤鳥帶煙來遠樹，斷雲收雨下斜陽。人間未卜蝸牛舍，遠目橫秋益自傷。

芭蕉

風期搖寒碧，虛庭日暮不侵何。因有恨，事常抱未舒心。

蜀葵

傾心知向日布潔解承陰空側黃金盞誰人與對斟

次韻公才對菊見懷

曩逢新感二毛侵尚阻清輝對菊期久疑芝蘭同臭味莫疑魚鳥自鳥深
食貧山豆復甘荼炙客病空懷葵楚音挂席無由上牛斗漫憑流水送歸心

寄田朝散善補

粉署標名舊山城識面新青雲摧勁翮空谷滯幽人世路謀身拙心田育
德醇久要知可卜頃蓋已情親

春日書懷

雲散交情薄基翻世態新山容猶帶臘鳥語已回春節物驚心遽立國入
夢頻東風如解語啼笑未歸人

春日溪橋

留戀春光慰病顏無情風雨卷春殘陰陰密綠籠溪暗細細疎紅點徑斑
老去益伶詩思澁惟來聊破酒腸慳不嫌門外無車轍得恣衰慵一味閒

登樓有懷

老愧凭欄目力昏百年懷抱向誰論晴空鴈起雲邊塞夕照人歸郭外村

中州十

八十六

因記昔遊驚迅屐暫將離恨付清樽誰人肯似邊居士遠駕朱輪過雀門

題滕奉使祠

本期蘇鄭共揚鑣不意芝蘭失後凋遺老祇今猶涕洟後生無復識風標
西陲鴈度霜前塞淅水推爭日暮橋追想生平英偉魄凌雲一笑豈能招

朱奉使弁

弁字少章宋吉州團練使天會六年以通問見留命以官託且疾固辭粹
然以錐刺之而不為瞬用是得歸凡居雲朔二十年自號觀如居士有曲
有風月堂詩話行於世

蘇子翼送黃精酒

仙經何物堪却老較功無如太陽草龍銜維銜名雖異莧公羊公事可考
蘇君真是神仙裔摘并陰功貫宮吳雲笈書成數萬言銀關珠宮用心早
獨知此物有奇効福地名山為儲寶不俾林泉新斲斤去杵曰謝師搗
况從高士論麴糜更課公田收秫糲一朝靈液淨瓷盞三冬浩氣生襟抱
且欣軟飽得澆腸漫說並流工補腦眼碧那憂散黑花髮白故應還翠葆
賈傳只願松醪醱劉瓚敢誇藥酒好直願五斗論解醒寧待三杯乃通道

誰知萬里落旄人亦許，魁尊自傾倒為君喚。迴雪客春八載，羈愁供一掃。
曼倩宜分此日桃，安期莫記他年棗。何煩更採石斛花，已覺容顏不枯槁。
根連石室喜入夢，句擬桐溪愧摘藻。平生我亦愛書札，朱髓綠腸勤探討。
幸君汲引成此志，鶴駕騶駘望仙島。吞腥啄腐非所心，歲晚茲言良可保。

初春以葛菁作齋，因憶往年避難大隕山，米積澗中為齋。齋
成汁為粉紅色而香美特異，乃信鄭人所言為不誣矣。今食
新齋，因成長韻。

藏蔬飽三冬，媚盤無羅糜。陳齋解束縛，冰雹散刀几。春畦蕪菁苗，入眼漸可
喜。青黃舍風露，採摘從此始。持歸作新齋，一飽脫鮮美。芥香溢肺肝，甘脆響
牙齒。捫腹幽窓下，芻豢詎能比。憶昔避難初，覓身重高裏。雲煙昏具茨，老稚
且棲止。燕兵大搜索，焚蕩石牛底。脫命搗虎山野，哭紛四起。暮投山前店，茅
棟倒燒毀。蒼伏窟室中，衣敝不蓋體。妻孥坐相對，生意薄於紙。晨朝行澗中，
采芹澗邊洗。鄭人誇此齋，他菜非所擬。氤氳投瓦盎，觸鼻似蘭芷。一杯紅粉
羹，美析醜勝仙醴。乃知野人獻涼薄，未宜鄙。今來滯殊鄉，白首家萬里。猶能
對葷糲，咀嚼出宮徵。回思十年夢，爭奪殊未已。飽食但謀身，吾願良有此。

中州十一

此人以松皮為菜，予初不知味。虞侍郎分餉一小把，因飯素
授厨人，與菌蔬雜進，珍美可喜。因作一詩。

吾老似出家，晚悟愧根鈍。滋旨却羶葷，裨悅要親近。偉哉十八公，茲道亦
精進。舍身奉刀几，割體絕嗔恨。鱗皴老龍皮，鳥齒滋芳潤。流膏為伏龜，千
歲未須問。便堪奴筭，蔽詎肯友芝菌。跣得一飽萬事皆，可擬侍郎文懿
後。落落衆推俊，澹然世味薄。內典得所信，香厨留淨供。頰食不言頓，晏然
默不語。草木雷音震，得法於此公。骨髓傳心印，應怜持節人。餉此為問評，
欲將無上味，為我洗塵盆。食之不敢餘，感激在方寸。

予以年事漸高，氣海不能熟生，煖冷旅中又無藥物，遂用火
攻之策，灼艾凡二百壯，吟呻之際，得詩二十韻。

不作漳濱卧，年侵血氣衰。據鞍思少壯，攬鏡嘆清羸。有病方求艾，無營莫
問著。心知出下策，理勝遇中醫。陽燄神逾速，銅仙術盡施。論功鄙炮製，取
穴辨毫釐。火帝恩光異，炎官續用奇。書營比差似，珠蟻迫方知。忖物嗟炮
營，觀形笑灼龜。煙微初炙手，氣烈漸躡皮。閉目書徒展，支頭枕屣移。發狂
還自哂，賈勇僅能支。宋鶴追風日，吳牛喘月時。忠言勞緩頰，善語為開眉。

服氣工夫遠燒丹歲月遲衛生防後患伐性釋前疑展轉那成夢呻吟且
當詩因心念民瘼出位嘆身卑欲已七年病當從百世師保身將保國未
可廢箴規

元夕有感

朔雪餘千里東風徧九州關河中土異燈火上元愁綠蟻嘗新釀青貂戀
故裘紫姑無用上世事正悠悠

憶鍾離濬

浚都同聚讀書螢楚岸春風憶送行三十年前初識面四千里外更關情
出疆我亦徒勞爾入仕君今何似生旅鴈相逢須一問要從郵上得新聲

炕寂三十韻

風土南北殊習尚非一獨出疆雖仗節入國暫同俗淹留歲再殘朔雪滿
崖谷禦冬貂裘弊一炕且跼伏西山石爲薪黝色驚射目方熾絕可通將
盡還自續飛飛湧女雲欲燄積紅玉稍疑雷出地又以風薄木誰容鼠棲
冰信是龍銜燭陽曦助喘息未害搖空腹惠氣生袴襦仍工展拳足豈惟
脫膚鱗兼復平體粟負暄那用詫執熱定思沃收功在歲寒較德比時煥

中州

十八

雖餘炙手爐寧有爛額酷矧當凝泓辰炎帝獨回轂玄冥真退聽祝融端
可錄嗟予亦何者萬里歌黃鵠偃仰對窓扉新煖謝衾褥壯懷羞龜媚晚
悟笑突曲因思墮指人暴露苦戰塚頻年未解甲蹈此鋒刃毒遙知軍中
肝食安豆粥陪臣將命來意懇誠亦篤有奇不能吐何術止南牧君心想
更切臣罪何由贖此身雖自温此志轉煩促論武貴止戈天必從人欲安
得四海春永作蒼生福聊擬少陵翁秋風賦茅屋

秋泉次韻

新醅滄滄溢瓶盆漱石秋泉帶雨渾翡翠五深雲液煖鷓鴣杓滿月波翻
照人光入樽壘瑩流齒香隨語笑噴已拚扶頭日三丈朝醒未解任昏昏

夜雨枕上

浙浙風聲止淒淒雨氣涼愁工繁客思夢故遠江鄉書疏親朋少干戈歲
月長平城弭節地可復見秋霜

客懷

兵氣常時見客懷何日開形骸病自瘦髮鬢老相催已負秦庭哭終期漢
節回風雷識意我一雨洗氛埃

敘序

戲序忽將晏節旋嗟未還區雲慘眾木寒雨失群山喪亂閑詩思詎謠發
病顏夢魂識舊隱時到碧溪灣

白髮

白髮使車前煙波思渺然霜清穫稻日風急披衣天客館但愁坐釣舟誰
醉眠乘槎會有便真到斗牛邊

有感

容貌與年改鬚毛隨意斑雁邊雲度塞鳥外日銜山仗節功矣在捐軀志
未閑不知垂老眼何日覩龍顏

劉善長出示李伯時畫馬圖

俯首舉尾拳一蹄掣韁欲喚騎不嘶矣官雀脊有兩足垂意見自與造父齊
難目麟驤鳳皇臆玉山永速未容食籟雲追電有餘地置之畫圖人豈識
精神權奇孰可班當在白兔青龍間君知此馬從何來龍眠宵中十二閑

謝崔致君餉天花

三年北鏢飽糶管佳蔬頗憶南州味地菜方為九夏珍天花忽從五臺至

中州

十一

崔侯宵中散千卷金甌名相傳雲裔愛山亦如謝康樂得此携歸豈容易
應怜使館久寂寥分餉明明見深意堆槃初見瑤草瘦鳴齒稍覺瓊枝脆
樹雞濕爛嫩扣門來娥青黃漫趨市赤城菌子立萬釘今日因君不知貴
乘龍耳僅免一割沙門業已通三世偃戈息民未有術雖復加食祇增媿
雲山去此縱不遠口腹何容更相累報君此詩永為好捧腹一笑萬事置

戰伐

戰伐何年定悲愁是處同黃雲繁晚塞白露下秋空魚羅深波月烏啼落
葉風誰知渡江夢一夜繞行宮

龍福寺煮東坡羹戲作

山寺解塵鞅溪邊有微行手摘諸葛菜自煮東坡羹雖無錦繡腸亦飽風
露清鈞簾坐捫腹落日千峯明

丙申中秋不見月

中秋萬里月何處駕冰輪底事隔年會不憐今夕人免疑停杵曰蟾豈避
風塵默識常娥意永平賞更新

十七夜對月

病骨怯風露愁懷厭甲兵人居絕域六月向此宵明輪反初經漢光分半
隱城遲遲不肯下應識異鄉情人轉少華髮此時世無外結七物

睡軒為趙光道作

深炷爐香睡息勻蕭然一覺得天真生涯聊示人間世綠境都忘藥裹身
窺牖屢來從汝喚叩門空去任渠噴更須滿壁圖靈示卧想江湖形卷香

南齋即事

頻年行役夢庭闈陟岫常嗟脚力疲每許酒巡嫌客惡力營官事笑兒癡
雲山幸不持錢買花竹何妨帶雨移此味貴人元未識恐緣詩好被渠知

餞和父之并州

有比何堪說如南未是歸并門子徑往漢節我方戰筆現論心久干戈會
面稀新程相憶處路入嶺雲微

獨坐

草凍慵抽碧桃癡懶暈紅黃雲猶漢野紫塞漫春風使節空留滯使圭未
會同階除雪不掃獨立數歸鴻

寒食

口州

二十

絕感年華久衰顏淚點新每逢寒食節頻夢故鄉春草綠唯恨花紅只
笑人南轅定何日無地不風塵

上巳

行行春向暮猶未見花枝晦朔中原隔風煙上巳疑常令漢節在莫作楚
囚悲早晚鸞旗發吾歸敢恨遲

送春

風煙節物眼中稀三月人猶戀褚衣結就客愁雲片段喚回鄉夢雨霏微
小桃山下花初見弱柳沙頭絮未飛把酒送春無別語羨君纔到便成歸

天問絕句

沈邊酣戰君臣蟻波上群嬉婢妾魚苦樂不同同一字問天此理竟何如

客夜

城月四更上窻風一室幽然雲氣寒重霧逼貂裘兵革何年息乾坤此
夜愁殊鄉兩行淚發眉酒清秋

據抱

客滯殊方又山圍地塞深秋風入橫笛夜月傍沾襟這際他時語掄疑此

日心飛霜滿明鏡，疑短不勝簪。

重九

九日今何地，寒深紫塞霜。敢憐蘆酒濁，且對菊花香。歲月雙蓬鬢，乾坤百戰場。賜黃知未舉，夢自識鴛行。

次韻劉太師若吟之什

長城五字屹逶迤，可笑偏師敢出奇。句補推敲未安處，領更添絮益難時。癡迷竟作禽填海，辛苦真成蠟度絲。却羨彌明攻具速，劉侯漫說也能詩。

善長命作歲除日立春

土牛已着勸農鞭，葦索仍專捕鬼權。且喜春盤兼守歲，莫嗟臘酒易經年。東風漸入江梅夢，朔雪猶迷塞柳天。元會明朝定何處，羈臣揮淚節旄前。

次韻子文秋興

逸興常時有，逢秋一倍多。山長含楚雨，天遠接吳波。尋壑同元亮，浮家伴志和。釣竿行入手，還着向來蓑。

冬雨

冬雨不成雪，北風寒未深。山藏千壘秀，雲結四垂陰。迥洒凌朝閣，殘聲入

中州

十一

夜，余端能洗兵甲，足慰此時心。

寒食感懷次韻吳英叔

疾風甚雨老難禁，嶺外無錫誰解吟。雙鬢客塵隨世變，兩眉鄉思儘愁侵。榆錢何處迎新火，杏粥頻年繫此心。落日高城塊易斲，天臨牛斗五湖深。

春陰

開河迤迤繞黃沙，慘慘陰風塞柳斜。花帶露寒無戲蝶，草連雲暗有藏鴉。詩窮莫寫愁如海，酒薄難將夢到家。絕域東風竟何事，祇應催我曠邊華。

寒食

清明六到客愁邊，雙鬢星星只自憐。兵氣尚纏巢鳳閣，節旄已落牧羊天。紙錢灰入松楸夢，餽粥香隨榆柳煙。北向鴈來寒霧隔，音書不比上林傳。

李任道編錄濟陽公文章與僕鄙製合為一集，且以雲館二星名之。僕何人也，乃使與公抗衡，獨不慮公是非者，紛紜於異日乎。因作詩題於集後，俾知吾心者不吾過也。庚申六月

丙辰江東朱弁書

東山川飽所經客，蓬歲晚任飄零。詞源未得窮三峽，使節何容比二星。

羅萬施松慙弱質兼設倚玉怪殊形齊名李杜吾安敢千載公言有千言
明公謂字文長通故通受官而少事以能自中取用長通見此詩
不松謂名自託孟子當年為使中與柳江東來并者蓋亦有淵意云

秋夜

秋夜雖漸水未抵客愁長秋月雖已圓不照寸心方將心貯此愁真作萬
斛重為月憐此夜誰共千里光空令還家夢欲趁征鴻翔

附見

蘧欽字趙滋

滋字濟甫本出馮翊其祖貞元間來為南京漕司戶籍判官卒官下妻子
不能歸遂為汴人濟甫少日出閭里聞其曉音律善談笑得之宣政故家
遺俗者為多及長厭于滄蕩乃更折節取古人書讀之學書學詩學
論文立志既堅力到便有所得為人強記默識不遺微隱唐以來名人詩
文往往成誦如目前考論文義解析絡脉殆若夙昔在文字間者畫入能
品詩學亦有功如黃石廟等作今代秉筆者或亦未可輕議閑閑趙公書
法為今代第一手學者多倣之但得其形似而已濟甫筆勢飛動頗得公
不傳之妙宗室胙公文采風流照映一時而濟甫以布衣從之游商略法
書名書胙公亦以真賞稱焉隆德太一故宮樓觀臺沼門戶道路花木水

合口州

二十二

石悉能歷數之聽者曉然如親到其處至於宋名賢所居第宅坊曲與其
家行輩群從孫息姻婭排比前後雖生長鄰里者不加詳也嘗過長清一
禪寺與僧談僧言五汰傳校圖大不易作濟甫笑曰易與耳因索筆作圖
坐中他日以舊本證之不毫末差也丁酉歲歿於東平時年五十九

黃石廟

狂豪擊車代無人神石一破志乃信吹噓風雲遮楚秦炎精熾然四百春
一編尚悒續後塵江山有待終此身望望又愁橫目民朝陽凄凄霜未休
江燕竟來江北游山回鼎移海橫流天風何時清九州草泥自古踰王侯
神弃不郵誰當着割牲醴酒空千秋

先大夫詩

鄉先生權叅知政事代郡楊公叔玉譔先人墓銘今略載於此先生姓元
氏字德明秀容人唐禮部侍郎次山之後自幼讀書出俗鄙事終其身不
挂口為人誠實樂易洞見肺腑雖童子以言欺之亦以為誠然也先大夫
歿遺產無幾先生布衣蔬食處之自若家人不敢以生理累之僮奴有竊
拾東家之棗者立命還之貧人負債則往往令折券以貸之也累舉不第

放浪山水間未嘗一日不飲酒賦詩春秋四十有八終于家先生作詩不
事彫飾清美圓熟無山林枯槁之氣居東山福田精舍首尾十五年東豈
其自號也有集三卷藏于家銘曰貪夫徇財智士死名宇宙古今萬轍混
并我機非張我戶弗局天宇泰然物莫敢攫飲芳食菲岩岫杳冥玉佩瓊
珞御風泠泠魯山之醇次山之清陶也幾傳猶有典刑總哉先生明昌承
安間科舉之舉盛大夫士非賦不談人知先人有聲場屋聞其以詩文爲
業則不知也先人捐館後十年好閑遊兵南渡遊道日廣世始知有元東
岩之詩楊尚書之美云彼美元夫子學道知觀淵孔孟澤有餘曾顏青木
殘林觀察顯卿云文章變古名新軀孝弟傳家守舊規雷內翰希顏云詩
句妙九州孝友化一川王右司仲澤云讀書楓樹林曳杖白石灣至今文
彩餘虎子仍班班李長源云衣冠巢許自高雅若壘夔龍非棄捐餘人不
能悉紀家集亂離以來凡三失之今所存者特吾益之兄及門生輩所記
憶者耳小子不肖暗於事機不能高蹈遠引戀終并斗激倖萬一以取繫
維之禍殘息奄奄朝夕待盡誠懼微言將絕謹以古律詩四十首附之中
州集之癸冊庶幾來者知百餘年間作詩如先人而人或未之見其餘抱

人口州

二二三

一繫之操浪浪默默終老而無聞者豈勝計哉是又可爲嘆也

桃源行

山中三月山桃開紅霞爛漫無邊涯藉山家藏春藏不得落花流水人間
來憶昔携家竄岩谷奈人半向長城哭回頭塵土失咸陽總弋徒勞羨鴻
鶴冬裘夏葛存大朴小國寡民皆樂俗畫永垣籬雞犬閑春晴門巷桑榆
綠漁郎偶到本無心仙境何緣得重尋今日武陵圖上看唯見雲林深復
深

送德温同舍赴廉試

太常侍祠水蒼珮內相夜下金蓮燭皇家結網未曾疎亦有佳人在空谷
一從唐賦變遼律仰視折楊猶雅曲雲臺勳業一青衫被髮操戈踵相屬
筋疲力涸僅乃得墨水一升凡幾辱英雄俯首入彀中舉世悉然非子獨
子家口衆親又老歲月甘須寸祿薦書聞說過南宮冷煖人情到僮僕
初學計吏人後人前隨碌碌不慚齊客售鼓瑟頗爲荆人悲獻玉一
詩今日送君行萬里秋風看鴻鵠功名前路知不免雞黍後期良未卜
標無用吃龍頭帛書且當傳口是

兩後

十日山中雨今朝見夕陽乾坤覺清曠草棘有輝光竹影搖殘滴松聲送晚涼南窓聊自適無用說羲皇

覽鏡

四十宜未老年年添鬢絲直教隨牒去也是挂冠時臺閣多新賦山林有逸詩悠然一樽酒滿酌不須辭

室人生朝

新酒清渾共糟床洗盞嘗平時唯欲醉此日重難忘容服慙王霸山林得孟光白頭翁與媪萬事聽諸郎

太原古城惠明寺塔秋望

西山萬古壯陪京一日汾流入發城浩浩雨聲爭曉集昫昫原隰但秋耕晉公老去詩仍在晉公晉陽官舍春日詩云白頭官舍裏今日又春風越石亡來恨未平千尺浮圖暮煙底瓦盆濁酒為誰傾

蕙遊同郝漕子玉賦

全晉山河百戰場登臨歷歷見興亡或居狴犴雜尤堪嘆霸氣沉雄亦未量

口占

二一四

石瓮煙霞詩秀潤駘祠風月酒淋浪書生不是功名具慚愧山翁問葛強

山中秋夕

菖菴存餘習青燈共晚涼只知書味永不覺鬢絲長老槍千年物幽蘭一國香平生陶靖節此夕趣相望

寄宗人彥達交城人

杯酒無緣接舊歡空將書尺問平安要君知我詩成處落日西風正倚欄

榴華

山茶赤黃桃絳白戎葵米囊不入格庭中忽見安石榴嘆息花中有真色生紅一撮掌中看摸寫雖工更覺難詩到黃州隔千里畫家辛苦費金丹

過鳳凰山在雁門

鳳凰聞說似天壇北去南來馬上看想得松聲滿崑崙谷秋風無際海波寒瓶形嶺早發在繁峙界

海雲蕭瑟雪花乾人在羊腸百八盤閑客不知名利苦見時應作畫中看寒食再遊福田寺

香山寂寂掩禪扉複嶺盤盤入翠微布鞋供勝踐野魚齋鼓蕩春機

日烘幽徑綠煙暖風定曉枝紅雨稀曾是西窗讀書客不應啼鳥也催歸

家園假山

八尺飛來峰蒼然立於獨細看甲乙字疑是平泉族山非一草石見石山亦足便恐東岫雲來我簷下宿今朝鑿盆池明朝種松菊自笑住山人何時返嘉谷

同侯子晉賦鴈

沉沉江浦雲浩浩朔漠雪微生幾寒暑翅老飛欲折樓中見新過夕照送明滅歌枕數聲來疎窓耿殘月悲鳴或天性南北隨所愜誰念孤旅人年年為愁絕

寒林圖為侯子晉賦

川光茫茫風景暮一雪無情天地素長安閉門千萬家亦有行人踏長路新豐煙火灞橋水畫史工作荒寒趣雪中故事知幾何偏識詩翁忍寒處君不見淮西城下鴉鷓鳴官軍夜斫吳家營只如兜家鹿俗亦不惡銀燭金荷天未明拈出雪詩三十韻寒驢席帽可憐生雪詩三十韻見坡集

贈答彥文相過之什程太原人

中州

二十五

剝啄誰叩門開門得吾友握手一大笑慰我離群久之子富才具事業可力取瞻望青松姿衰遶愧蒲柳金闕滿鷓鴣汗伯自為偶寂寞林野人過從但隣叟盤飧無菘味爭藏才適口窮達俱偶然相逢且杯酒

枕上

往時見白髮談笑輕歲月誰謂明鏡裏蕭蕭不勝簪山林蹉跎久世慮初未絕觸物重興懷忽忽不自愜遭逢有奇耦才用隨巧拙如何杜陵叟自比椶與契茫茫樹壁編何時卒吾業

秋暮王氏園亭

細徑雲林底危亭間水湄秋先殞黃華寒未老紅蕖曾句幽禽答尋花晚蝶隨無人共幽興思與野僧期

六言

北闕三臺五省東山蕩壑千岩翠書中有真味風月外無多談

山園梨葉有青紅相半者戲作一詩

霜輕霜重偶然中一葉雖殊萬葉同不信世間閑草木解隨兒女作青紅

詩

少有吟詩癖吟來欲白頭科名不肯換家事幾曾憂舍出將誰語研磨若
自辭百年閑伎倆直到死時休

尊酒

土灰論遠計木石笑浮生但有一尊酒何須千載名

憶山中二絕句

東寺留連飲張園曠漫遊兒童望歸路一日幾登樓
秋色山中好山翁醉不醒不知籬下菊霜後幾叢開

山中雨後

遠屋端聲轉臨崖老樹樵雷轟一雨去雲攀兩山開

遣興

張翰一盃酒林逋千首詩性唯便自適材敢論時施狡兔從三窟鷓鴣分
一枝青山有佳色只似往年時

發冀州留別恩禪師

詩拙非同社情親本故鄉共知成遠別且復暫相將池古蓮花淨窓深檜
葉香何時重携酒來宿贊公房

中州十

貴公子詠

高堂紅燭鼓聲齊舞徧纖腰月未西一曲纏頭一雙錦驛駟空自惜墮泥
蓮葉觀音恩禪師所藏同路宣叔賦

瑞相分明一葉中華嚴性海共圓通補陀自有丹青變畫史區區可得工

謝張使君夢新餽春肉

牙豬肋厚一尺玉鹽花入深蒸脫骨韭芽葱甲春滿盤走送茅齋慰幽獨
山人食貧才一粥幾被艾生嘲首藉食前方丈非素懷頓憶懸瓠繞高屋
呼來鄰叟共一飽為說使君方繼肉飢民待哺今幾家無策贊君慚此腹
區區一肉見歌詠說食書生良未定却愁今夕夢寐閒有物踏破園蔬綠

仙雞詩并序

繁時義興鎮酒家韓氏子畜一雞以香關雄其鄉一日敵家以藥飼雞使
不知痛求與韓雞對韓雞聞久果被傷口下頷不收垂死矣一賣藥道人
過其門曰我能活此韓欣然使瘡之里中諸兒隨看者一二十輩皆使向
壁立道人以雞置籠中探手良久若摩拊然者已而取瓢水噴之置瓢籠
上即出門兒曹怪其久不還竊視之雞喙已復生矣道人布袍草冠腋下

懸青囊落魄嗜酒夜宿寺閣上韓氏子與里中人奔走求之并所卧草履不在矣是時明昌七年仲規弟為此鎮酒官予亦在焉作仙雞詩以記之老雄健鬪夸擅場韓郎抱歸神色揚豈知黠兒出微倖毒手一發不得妨毳毛散灑尚可養利鬚一咳何由張青囊道人何許來自言拔藥吾有方垂頭嚙水濯殘血半喙隨手生新黃筠籠半開闔臙膊草冠已往徒驚忙神仙世有寧虛荒惜哉詭激不可量世人鷲勇天且剗况於物也資強梁敷榮枯枿變金石未若與世鍼膏盲何須變化示狡獪知君辦作淮南王蓬萊東望雲茫茫愛而不見心為狂刀圭不願換凡骨且欲共醉無何鄉

燈下讀林和靖詩

落葉落復落清霜今幾番
踈燈照茅屋山月入頽垣
老愛寒花淡幽嫌宿鳥喧
卷中林處士相對兩忘言

觀西岩張永淳畫雁

徐淡經營下筆難
畫成不似卷中看
知君連夜江湖夢
打葦蕭蕭沙水寒

從趙敷道覓石榴

仙人囊中五色露
得種昔與蒲桃俱
猩猩染花開五月
已覺秋實懸庭除

口州

二一七

張園一酸齒欲裂
君家兩株蚤不如
竹馬兒童厭梨栗
綠葉表也為剝下

雪行

五更驢背滿靴霜
殘雪離離草樹荒
身在景中無句寫
錯教人比孟襄陽

龍眠畫馬

驪黃求馬世皆然
滅没存亡自一天
當日塩車人不識
只今空向畫中傳

歲暮

蕪蕪霜力勁沉沉
山氣冥冥北風半
夜起吹動一天星

送張冀州致政還都狀元行簡之父

一扎恩書下紫宸
東門祖道畫圖新
路人也解賢疎傳
河內猶思借寇恂
父子文章千載事
田園松菊自由身
玉京才過梨花節
靈沼行春莫厭頻
用宋退傅張公閑遊靈沼探春回故事

春雪

幾日韶華雪更侵
龍公試手本無心
寒留整整斜斜態
暖入融融洩洩陰
著柳直疑香絮重
攔階還似落花深
前頭桃李應無恙
刺破相如買賦金

秋樹



道邊樹老龍形社酒澆來新有靈只恐等閑風雨夜怒隨雷電上青冥

七夕

天河唯有鵲橋通萬劫權緣一瞬中惆悵五更仙歌逐寂寥雲慘掩秋風

觀柘枝伎

腰鼓聲乾揭畫梁綵雲擎出柘枝娘簾間飛燕時窺影鑑裏驚鷺易斷腸
輕細不妨重暈錦迴旋遠恐碎明璫杖頭白雨催花急拂散春風兩袖香

敏之兄詩

敏之諱好古性識穎悟讀書能強記務為無所不聞年二十就科舉時先
東岩君已捐館 太夫人年在喜懼望其立門戶為甚切及再上不中意
殊不自聊又娶婦不諧日致惡語遂以狷介得疾嘗作望月詩有莫怪更
深仍坐待密雲或有暫開時之句人或言詩境不開廣非佳語也嘆曰吾
得年不求境趣能開廣否未幾没于比兵之禍年三十一

中秋無月

佳辰無物慰相思先賞空吟昨夜詩莫怪更深仍坐待密雲或有暫開時

讀裕之弟詩藁有與馬聲柳巷深之句漫題三詩其後

口列

二二八

何公翁醉語戲兒癡說着蝶詩也道奇吳下阿蒙非向日新篇爭遣九泉知
鷺鷥藏深樹只聞聲不着詩家畫不成慚愧阿兄無好語五言城下把降旌
傳家詩學在諸郎剖腹留書死敢忘先人臨終有剖腹留書之語 北自上錦囊三
箭在直須千古說穿揚

題江村風雨圖

渡口丹橫水拍空墨雲傾雨樹號風江山不到紅塵眼半幅煙銷想像中

中州集卷終



中州樂府

吳內翰彥高五首

蔡丞相伯堅一十二首

蔡太常正甫一首

高內翰士談一首

劉內翰鵬南一首

鄧千江一首

趙內翰獻之二十首

任南麓君謨一首

馮臨海士美一首

李丞百致美四首

劉龍山致君二十一首

劉記室無黨二首

党丞百世傑五首

王內翰子端二十一首

王隱君逸賓一首

密國公子瑜七首

禮部閑閑趙公六首

胥莘公和之一首

許司諫道真二首

馮內翰子駿一首

溪南詩老辛敬之一首

李右司欽叔三首

王右司仲澤一首

李扶風正臣一首

景伯仁三首

宗室文卿一首

高仲常二首

王子可三首

王監使正之一首

趙內翰子充二首

孟內翰友之一首

張太尉信甫一首

王玄佐一首

趙愚軒宜之三首

先東巖君二首

折治中元禮一首

吳內翰彥高

中州

人月圓

南朝千古傷心事猶唱後庭花舊時王謝堂前燕子飛向誰家恍然一夢
仙肌勝雪宮髻堆鴉江州司馬青衫淚濕同是天涯

彥高北遷後為故宮人賦此時宇文叔通亦賦念奴嬌先成而頗近鄙
俚及見彥高此作茫然自失是後人有求作樂府者叔通即批云只矣即
近以樂府名天下可往求之

訴衷情

夜寒茅店不成眠殘月照吟鞭黃花細雨時候催上渡頭船鷗似雪水如
天憶當年到家應是童稚牽衣笑我華顛

春從天上來

海角飄零嘆漢苑秦宮墜露飛螢夢裏天上金屋銀屏歌吹竟舉青冥問
當時遺譜有絕藝鼓瑟湘靈促哀彈似林鷲瀝瀝山溜泠泠梨園太平樂
府醉幾度春風鬢變皇皇舞破中原塵飛滄海風雪萬里龍庭寫胡笳幽
怨人憔悴不似丹青酒微醒對一窻涼月燈火青燐

好問曾見王防禦公玉說彥高此詞句句用琵琶故實引據甚明今忘之矣

滿庭芳

誰挽銀河青冥都洗故教獨步蒼蟾露華仙掌清淚向人霑畫棟秋風嫋
嫋飄桂子時入疎簾冰壺裏雲衣霧鬢掬水弄春纖厭厭成勝賞銀燭潑
汞寶鑑披奩待不放楸梧影轉西簷坐上淋漓醉墨人人看老子掀髯明
年會清光未減白髮也休添

風流子

書劍憶游梁當時事底處不堪傷蘭楫嫩漪向吳南浦杏花微雨窺宋東
墻鳳城外燕隨青步障絲惹紫游韁曲水古今禁煙前後暮雲樓閣春草
池塘回首斷回腸年芳但如霧鏡髮成霜獨有蟻尊陶寫蝶夢悠颺聽出
塞琵琶風沙浙瀝寄書鴻鴈煙月微茫不似海門潮信能到潯陽

蔡丞相伯堅

大江東去二首

離騷痛飲問人生佳處能消何物江左諸人成底事空想岩岩青壁五畝
蒼煙一丘寒玉歲晚憂風雷西州扶病至今悲感前傑我夢卜築蕭閑竟
來岩桂十里幽香發硯磊曾中冰與炭一酌春風都滅勝日神交悠然得

中州樂

二

意離恨無毫髮古今同致永和徒記年月

倦游老眼放閑身管領黃華三日客子秋高茅舍外蒲眼秋嵐欲滴澤國
清霜澄江爽氣染出千林赤感時懷古酒前一笑都釋千古栗里高情雄
豪割據戲馬空陳迹醉裏誰能知許事俯仰人間今昔三弄胡床九層飛
觀喚取穿雲笛涼蟾有意爲人點破空碧

水調歌頭

雲間貴公子玉骨秀橫秋十年流落冰雪香靄紫貂裘燈火春城咫尺曉
夢梅花消息噩帝寫銀鈞老矣黃塵眼如對白蘋洲世間物唯有酒可忘
憂蕭閑一段歸計佳處着君侯翠竹江村月上但要綸巾鶴氅來往亦風
流醉墨薔薇露洒遍酒家樓

月華清

樓倚明河山蟠喬木故國秋光如水常記別時月冷半山環珮到而今桂
影尋人端好在竹西歌吹如醉望白蘋風裏關山無際可惜瓊瑤千里有
年少玉人吟嘯天外脂粉清輝冷射藕花冰蕊念老去鏡裏流年空解道
人生適意誰會更微雲踈雨空庭鶴唳

江神子慢賦瑞香

紫雲點楓葉岩樹小婆娑歲寒節占高潔纖苞煖釀出梅魂蘭魄照濃碧
茗盃添春花氣重芸窗晚濛濛浮霽月小眠鼻觀先通廬山夢舊清絕蕭
閑平生淡泊獨芳溫一念猶未衰歇種陳迹而今老但覓茶煙禪榻寄閑
寂風外天花無夢也鴛鴦舊債從渠千萬劫夜寒回施幽香與春愁客

聲聲慢涼陞寄內

青蕪平野小雨千峰還成暮陞寒色裁剪芸窗憶得伴人良夕遙憐幾重
眉黛恨相逢少於行役梨花淚正宮衣春瘦曉紅無力應怪浮雲夫婿不
解趁新醅醉眠涼月怨入關河西去又傳音息誰知倦游心事向年來苦
思泉石人未老約閭峰多占秀碧

石州慢高麗使還日作

雲海蓬萊風霧鬢環不假梳掠仙衣捲盡雲霓方見宮腰纖弱心期得處
世間言語非真海犀一點通寥廓無物比情濃覓無情相博離索曉來一
枕餘香酒病賴花豎却灑灑金尊收拾新愁重酌片帆雲影載將無際關
山夢魂應被揚花覺梅子雨絲絲滿江干樓閣

中州詞

尉遲盃

紫雲暖恨翠雛珠樹雙栖晚小花靜院相逢的的風流心眼紅潮照玉盃
午香重草綠宮羅淡喜銀屏小語私分麝月春心一點華年共有好願何
時定粧鬟暮雨零亂夢似花飛人歸月冷一夜小山新怨劉郎興尋常不
淺况不似桃花春溪遠覺情隨曉馬東風病酒餘香相半

驀山溪

清明綠野玉色明春酒燕地雪如沙爲喚起斗南溫秀鬢絲禪榻夢覺古
揚州瑤臺路返魂香好在啼粧瘦春前入眼似是章臺柳欲典鸚鵡裘候
金車香迎馬首綠陰青子後日便東風秋千散暮寒生月到西廂後

鷓鴣天二首

解語宮花出畫簷酒尊風味爲花甜誰憐夢好春如水可奈香餘月入簾
春漫漫酒厭厭曲終新恨到眉尖此生願化雙瓊柱得近春風煖玉纖
秀樾橫塘十里香水花晚色靜年芳煙脂雪瘦薰沉水翡翠盤高走夜光
山黛遠月波長暮雲秋影蘸瀟湘醉魂應逐凌波夢分付西風此夜涼

江城子

半年無夢到春溫可憐人幾黃昏想見玉徽風度更清新翠射娉婷雲
尺誰爲寫五湖真好風歸路軟紅塵煖冰魂縷金裙喚起一天星月入金
尊留取木犀花上露揮醉墨酒行雲

公有詩八尺五湖明秀峰又云十丈琅玕倒冰玉明年爲寫五湖真正用
此詞意魏道明作注義有不通故表出之

蔡太常正甫

江城子 王溫季自北都歸過予三河坐中賦此

鵲聲迎客到庭除問誰歟故人車千里歸來塵色半征裾珍重主人留客
意奴白飯馬青芻東城入眼杏千株雪模糊俯平湖與子花間隨分倒金
壺歸報東垣詩社友曾念我醉狂無

高內翰士談

玉樓春 爲伯求作

少年人物江山秀流落天涯今白首形容憔悴不如初文彩風流仍似舊
百花元是仙家酒千歲靈根能益壽都將萬事付天公且伴老人開笑口

木蘭花減字

中州詞

四

西湖睡起飛絮游絲春老矣漲綠涵空十頃玻璃四面風時平事少天與
湖山供坐嘯他日西州却怕羊曇感舊游

朝中措

瑯琊山色最清雄心賞待衰翁路轉峰回如畫新亭半濕青紅風流肩從
清閑歲月且共從容莫笑尊前老大猶堪管領春風

劉內翰鵬南

鷓鴣天

雪照山城玉指寒一聲羌管怨樓間江南幾度梅花發人在天涯鬢已班
星點點月團團倒流河漢入盃盤翰林風月三千首寄與吳姬忍淚看

鄧千江臨兆人

望海潮 上蘭州守

雲雷天塹金湯地險名藩自古臯蘭營屯繡錯山形米聚喉襟百二秦關
鏖戰血猶殷見陣雲冷落時有鷓鴣盤靜塞樓頭曉月依舊玉弓彎看看定
遠西還有元戎閫令上將齋壇區脫晝空堯零夕舉甘泉又報平安吹笛
虎牙閑且宴陪珠履歌按雲璈未拓興靈醉魂長繞賀蘭山

趙內翰獻之

望海潮代州南樓

雲胡南陸全趙幕府河山襟帶名藩有朱樓縹緲千雉回旋雲度飛狐絕
險天圍紫塞高寒吊興亡遺跡咫尺西陵煙樹蒼然時移事改極目春心
不堪獨倚危欄惟是年年飛雁霜雪知還樓上四時長好人生一世誰閑
故人有酒一尊高興不減東山

暮山溪賦崇福荷花崇福在太原晉溪

雲房西下天共滄波遠走馬記狂游正芙蓉平鋪鏡面浮空欄檻招我倒
芳尊看花醉把花歸扶路清香滿水楓舊曲應逐歌塵散時節又新涼料
開徧橫湖清淺冰姿好在莫道總無情殘月下曉風前有恨何人見

好事近

密雪聽窻知午醉晚來初覺人與膽餅梅菜共此時蕭索倚窻閑看六花
飛風輕止還作箇裏有詩誰會滿疎籬寒雀

浣溪沙二首

擡轉爐薰自換香錦衾收拾却遮藏二年塵暗小鴛鴦落木蕭蕭風

口州詞

五

似雨疎橋皎皎月如霜此時此夜最淒涼

火冷薰爐香漸消更闌撥火更重燒愁心心字兩俱焦半世清狂無限事
一窻風月可憐宵燈殘花落夢無聊

望海潮發高麗作

雲垂餘霞霞拖廣袂人間自有飛瓊三館俊將百銜高選翩翩老阮才名
銀漢會雙星尚相看脉脉侶隔盈盈醉玉添春夢雲同夜惜卿卿離鷓草
草同傾記靈犀舊曲晚枕餘醒海外九州郵亭一別此生未卜他生江上
數峰青悵斷雲殘雨不見高城二月遼陽芳草千里路傍情

卜筮子譜太白詩話

明月在青天借問今時幾但見宵從海上來不覺雲間墜流水古今人共
看皆如此唯願當歌對酒時長照金尊裏

鷓鴣天二首

金絡閑穿御路揚青旗遙認醉中卿可人自有迎門笑下馬何妨索酒嘗
春正好日初長一尊容我駐風光歸來想像行雲處薄雨霏霏洒面涼
千頃平波溢岸清草香沙煖水雲晴輕衫短帽垂楊裏楚潤相看別有情

揮彩筆倒銀鉶花枝照眼句還成老來漸減金釵興回施春光與後生集句

鳳棲梧

霜樹重重青嶂小高棟飛雲正在霜林杪九日黃花才過了一尊聊慰秋容老翠色有無眉淡掃身在西山却愛東山好流水極天橫晚照酒闌望斷西河道

任南麓君謨

永遇樂

月已中秋菊還重九夜久涼重滿地清霜半天白曉孤唱聞耕龍蕭蕭窻几依然琴硯但覺鼠窺風動悔生平趨前猛甚晚退却成無勇興衰更換妍媸清混造物大相愚弄三釁羞人五交賈壻高侯伯寧無種而今此念消除都盡唯有故山歸夢吾廬更雙溪清遠萬峰翠擁

馮臨海士美

江城子

胭脂坡上月如鉤問青樓見溫柔庭院深沉窻戶掩清秋月下香雲嬌墮砌花氣重酒光浮清歌皓齒艷明眸錦纏頭若爲酬門外三更燈影立驂

口州詞

六

騶結習未忘吾老矣煩惱夢赴東流

李丞旨致美

婆羅門引 保德西樓作

汗融畏日豈知高處有風清倚欄襟袖涼生坐看崩雲脫壞不礙亂峰青待目窮千里却怕傷情河分古城聽裂岸怒濤驚好是烽沉幽障鼓臥邊亭西樓老子更無用曾中十萬兵酒到處莫放盃停

虞美人

佳人酒暈紅生頰艷艷霞千疊雨餘紅淚濕黃昏誤認當年人面倚朱門飄零又送青春暮悵望劉郎去教人不恨五更風只恨馬蹄無處避殘紅

鷓鴣天

萼萼萼萼雨後村芳塵不到五侯門曾隨曉淚擦詩思又向春風入燒痕春去後憶王孫啼紅南浦記芳溫夕陽樓外連天遠乞與騷人怨楚魂

回文菩薩蠻

斷腸人去春將半歸客倦花飛小窻寒夢曉誰與畫愁眉

劉龍山致君

鷓鴣天二首

滿樹西風鎖建章官黃未晷前霜誰能載酒陪花使終日尋香過苑墻
修月客弄雲娘三吳清興入淋浪草堂人病風流減自洗銅餅煮蜜嘗
騎鶴峰前弟一人不應着意怨王孫當時艷態題詩處好在香痕與淚痕
調鴈柱引蛾顰綠窻絃索若能纂砌臺歌舞陽春後明月朱扉幾斷魂
樓宇沉沉翠幾重轆轤亭下落梧桐川光帶晚虹垂兩樹影涵秋鵲喚風
人不見思何窮斷腸今古夕陽中碧雲猶作山頭恨一片西飛一片東
璧月池南剪木栖六朝宮袖窄中宜新聲感巧蛾顰黛纖指移纂鴈着絲
朱戶小畫簾依細香輕夢隔涪溪西風只道悲秋瘦却是西風未得知

南歌子

榴破猩肌血萱開鳳尾黃舊閑風簾雪肌涼一枕濃香魂夢到巫陽雲紵
描瑤草蓮腮洗玉漿碧梧深院小藤床此意一江春水正難量

攤破浣溪沙

蚕欲眠時日已曛柔桑葉大綠團雲羅羅猶小陌上看行人翠實佗條梅
弄色輕花吹瓏麥初勻鳴鳩聲裏過盡太平村

中州詞

浣溪沙四首

貼體官羅試袂衣冰藍嬌淺染東池春風一把瘦腰支戲縷寶鈿呈翡翠
笑拈金剪刀下醪醖最宜京兆畫新眉

萬疊春山入寸心章臺西去柳陰陰藍橋特為好花尋別後魚封煙漲閣
夢迴鸞翼海雲深情知頓着有如今

繡館人人倦踏青粉垣深處鏡錢聲賣花門外綠陰輕簾幕風柔飛燕燕
池塘花暖語鴛鴦有誰知道一春情

摩腹推腰春事非樂天猶恨小樊歸多生餘念向來癡往事半隨殘夢轉
飛詞不盡短封題竹奴應笑減膏圍

謁金門

簾半空四座綠圍紅簇歌盡玉臺連夜燭懽緣仍恨促休唱蓮舟新曲煙
水畫船搖綠腸斷鴛鴦為三十六紫蒲相對浴

劉記室無黨

烏夜啼二首

菱鑑玉篔篋秋月蕙爐銀葉朝雲宿醒人困屏山夢煙樹小江村翠甲未消

蘭恨粉香不斷梅魂離愁分付殘春雨花外泣黃昏
離恨遠繁楊柳夢魂長遠梨花青衫記得章臺月歸路玉鞭斜翠鏡啼痕
印袖紅牆醉墨籠紗相逢不盡平生事春思入琵琶

党丞百世傑

青玉案

紅紗綠弱春風餅趁梅驛來雲嶺紫桂若空瓊竇冷佳人却恨等閑分破
縹緲雙鸞馬影一甌月露心魂醒更送清歌助清興痛飲休辭今夕永與君
洗盡滿襟煩暑別作高寒境

感皇恩 賦疊羅花

碧玉撚柔條藍袍裁葉明艷黃深軟金疊道裝仙子謫墮葉珠仙闕為春
閑管領花時節漢額粧穠楚晉舞怯裝積裙餘舊宮褶東君著意留伴小
庭風月任教鷓鴣喚羣芳歇

鷓鴣天

雲步凌波小鳳鈎年年星漢踏清秋只緣巧極稀相見底用人間乞巧樓
天外事兩悠悠不應也作可憐愁開簾放入窺窻月且盡新涼睡美休

中州詞

八

感皇恩

一葉下梧桐新涼風露喜鵲橋成渺雲步舊家機杼巧織紫綃如霧新愁
還織就無重數天上何年人間朝暮回首星津又空渡盈盈別淚散作半
空踈雨離魂都付與秋將去

月上海棠 用前人韻

傲霜枝裊團珠蕾冷香霏煙雨晚秋意蕭散繞東籬尚彷彿見山清氣西
風外夢到斜川栗里斷霞魚尾明秋水帶三兩飛鴻點煙際踈林颯秋聲
似知人倦游無味家何處落日西山紫翠

王內翰子端

大江東去 癸巳暮冬小雪家集作

山堂晚色滿踈籬寒雀煙橫高樹小雪輕盈如解舞故故穿簾入戶掃地
燒香團藥一笑不道因風絮冰漸生硯問誰先得佳句有夢不到長安此
心安穩只有歸耕去試問雪溪無恙否十里淇園佳處脩竹林邊寒梅樹
底准擬全家住紫門新月小橋誰掃歸路

謁金門

雙喜鵲幾報歸期渾錯儘做舊愁都忘却新愁何處着瘦雪一痕墻角青
子已粧殘萼不道枝頭無可落東風猶作惡

鳳樓梧

衰柳踈踈苔滿地十二欄干故國三千里南去北來人老矣短亭依舊殘
陽裏紫蠟黃柑真解事似情西風勸我歸歟未至聚登臨寒落際鴈飛不斷
天連水

菩薩蠻回文三首

斷腸人恨餘香換塵暗鎖窗春小花簷月曉屏掩半山青
客愁楓葉秋江隔行遠望高城故人新恨苦斜日晚啼鴉
白雲孤映遙山碧樓倚一天秋斷腸隨鴈斷來鴈與書回

清平樂賦杏花

今年春早到處花開了只有此枝春恰到底輕蟬淺笑風流全似梅花
承當踈影橫斜斜夢想雙溪南北竹籬茅舍人家

烏夜啼

淡煙踈雨新秋不禁愁記得青帘江上酒家樓人不住花無語水空流只

中州詞

九

有一雙橋燕肯相留

訴衷情

夜涼清露滴梧桐庭樹又西風薰籠舊香猶在曉帳煖芙蓉雲淡薄月朦
朧小簾攏江湖殘夢半在南樓畫角聲中

清平樂應制

瓊枝瑤月簾捲黃金闕宮鬢蛾兒雙翠葉點綴離南開雪東風扇影佯還
紅雲不隔天顏夜夜華燈萬樹年年碧海三山

水調歌頭

秋風秃林葉却與鬢生華十年長短亭重落日冷邊笳飛鴈白雲千里况
是登山臨水無賴客思家獨鶴歸何晚已後滿林鴉望蓬山雲海闊浩無
涯安期王烏何處袖有棗如瓜一笑那知許事且看尊前故態耳熱眼生
花肝肺出芒角漱墨作枯槎

謁金門賦玉簪

秋蕭索燈火新涼簾幕翠被不禁臨曉薄南樓聞畫角想見玉壺冰萼一
夜西風開却夢覺烏啼殘月落幽香無處着

王隱君逸賓

浣溪沙夢中作

林樾人家急暮砧夕陽人影入江深倚欄踈快北風襟雨自北山明處黑
雲從白鳥去邊陰幾多秋思亂鄉心

密國公子瑜

朝中措

襄陽古道灞陵橋詩興與秋高千古風流人物一時多少雄豪霜清玉塞
雲飛隴首楓落江皋夢到鳳凰臺上山圍故國週遭

春草碧

幾番風雨西城陌不見海棠紅梨花白底事勝賞忽忽政自天付酒腸窄
更笑老東君人間客賴有玉管新翻羅襟醉墨望中倚欄人如曾識舊夢
回首何堪故苑春光又陳迹落盡後庭花春草碧

青玉案

凍雲封却馳岡路有誰訪溪梅去夢裏踈香風似度覺來唯見一窻涼月
瘦影無尋處明朝畫筆江天暮定向漁蓑得奇句試問簾前深幾許兒童

口州詞

笑道黃昏時候猶是簾纖雨

秦樓月

寒仍暑春來秋去無今古無今古梁臺風月汴堤煙雨水涵天影秋如許
夕陽低處征帆舉征帆舉一行驚鴈數聲柔櫓

沁園春

壯歲耽書黃卷青燈留連寸陰到中年贏得清貧更甚蒼顏明鏡白髮輕
簪衲被蒙頭草鞋著脚風雨瀟瀟秋意深淒涼否瓶中圓粟指下忘琴一
篇梁父高吟看谷變陵遷古又今便離騷經了靈光賦就行歌白雪愈少
知音試問先生如何即是布袖長垂不上襟掀髯笑一盃有味萬事無心

西江月

一百八般佛事二十四考中書山林朝市等區區著甚由來自苦過寺談
些般若逢花倒箇葫蘆少時伶俐老來愚萬事安於所遇

臨江仙

倦客更遭塵事冗故尋閑地婆娑一尊芳酒一聲歌盧即心未老潘令鬢
先皤醉向繁臺臺上問滿川細柳新荷薰風樓閣夕陽多倚欄凝思久漁

笛起煙波

禮部閑閑趙公

水調歌頭

四明有狂客呼我謫仙人俗緣千劫不盡回首落紅塵我欲騎鯨歸去只恐神仙官府嫌我醉時真笑拍羣仙手幾度夢中身倚長松聊拂石坐看雲忽然黑霓霓落手醉舞紫毫春寄語滄浪流水曾識閑閑居士好為濯冠巾却返天台去華髮散麒麟

昔擬栩仙人王雲鶴贈予詩云寄與閑閑傲浪仙枉隨詩酒墮九緣黃塵遮斷來時路不列蓬山五百年其後玉龜山人云子前身赤城子也子因以詩記之云玉龜山下古仙真許我天台一化身擬折玉蓮騎白鶴他年滄海看揚塵吾友趙禮部庭玉說丹陽子謂予再世蘇子美也赤城子則吾豈敢若子美則庶幾焉尚媿辭翰微不及耳因作此以寄意焉

青杏兒

風雨簷花愁風雨罷花也應休勸君莫惜花前醉今年花謝明年花謝白

中州詞

十一

了人頭葉興兩三甌棟溪山好處追遊但教有酒身無事有花也好無花也好選甚春秋

梅花引過天門閣作

山如峽天如席石顛樹老冰崖坼雪霏霏水洄洄先生此道胡為乎來哉石頭馬滑馬蹄蹶昂頭貪看山奇絕短童隨轍雙眉休說清寒形容相更飢杖頭倒挂一壺酒為問人家何處有將冰鬚煖朝寒何人畫我霜天曉過關

大江東去用東坡先生韻

秋光一片問蒼蒼桂影其中何物一葉扁舟波萬頃四顧粘天無壁叩拙長歌常蟻欲下萬里揮冰雪京塵千丈可能容此人傑回首赤壁磯邊騎鯨人去幾度山花發澹澹長空今古夢只有歸鴻明滅我欲從公乘風歸去散此麒麟髮三山安在玉簫吹斷明月

缺月挂疎桐擬東坡作

烏鵲不多驚貼貼風枝靜珠貝橫空冷不收半濕秋河影缺月墮幽窻推枕驚深省落葉蕭蕭聽雨聲簾外霜華冷

秦樓月

簫聲苦蕭聲吹斷夷山雨夷山雨人空不見吹臺歌舞危亭目極傷平楚
斷霞落日懷千古懷千古一盃還醉信陵墳土

晉華公和之

阮郎歸寄李都運有之

人情冷暖共高低踈慵非所宜老夫碌碌本無機閑教造物疑形木槁鬢
絲垂山林先有期故人只道挂冠遲此心應不知

許司諫道真

行香子

秋入鳴皋爽氣飄蕭挂衣冠初脫塵勞窻間岩岫看盡昏朝夜山伍晴山
近曉山高細數閑來幾處村醪醉糲糊信手揮毫等閑陶寫問甚風騷樂
因循能潦倒也消搖

眼兒媚

濁醪爲得玉爲漿風韻帶橙香持盃笑道鵝黃似酒酒似鵝黃世緣老矣
不思量沉醉又何妨臨風對月山歌野調儘我踈狂

八口州詞

三

馮內翰子駿

玉樓春 宴河中瑞雲亭

長原迤邐孤麋臥野色微茫河界破草丞行屢綠雲深花觸飛丸紅雨安
高亭初試煎茶火醉玉漸譁春蒲座行盃莫厭轉籌頻佳節等閑飛馬過
溪南詩老辛敬之

臨江仙 河山亭留別欽叔裕之

誰識虎頭峯下客少年有意功名清朝無路到公卿蕭蕭華屋白髮老諸
生邂逅對床逢二妙揮毫落帟堪驚他年聯袂上蓬瀛春風蓮燭莫忘此
時情

李右司欽叔

春草碧

紫簫吹破黃州月藪藪小梅花飄香雪寂寞花底風鬟顏色如花命如葉
千里沈兵塵凌波鞵心事鑑影鷺孤笳絃鴈絕舊時雪堂人今華髮斷腸
金縷新聲杯深不覺琉璃滑醉夢遶南雲花上蝶

江梅引 爲飛伯賦青梅

漢宮嬌額倦塗黃試新粧立昭陽萼綠仙姿高髻碧羅裳翠袖卷紗閑倚
竹暝雲合瓊枝薦暮涼璧月浮香搖玉浪拂春簾瑩綺窗冰肌夜冷滑無
粟影轉斜廊冉冉孤鴻煙水渺渺三湘青鳥不來天也老斷魂此清霜靜
楚江

浣溪沙 何中環勝樓感懷

垂柳陰陰水拍堤欲窮遠目望還迷平蕪盡處暮天低萬里中原猶北顧
十年長路却西歸倚樓懷抱有誰知

王右司仲澤

水龍吟 從商帥國器獵同裕之賦

短衣匹馬清秋慣曾射虎南山下西風白水石鯨鱗甲山川圖畫千古神
州一時勝事賓僚儒雅快長堤萬弩平岡千騎波濤卷魚龍夜落日孤城
鼓角笑歸來長圍初罷風雲慘澹獵獬得意旌旗閑暇萬里天河更須一
洗中原兵馬看鞬囊嗚咽咸陽道左拜西還駕

李扶風正臣

滿江紅 示婦

中州詞

十三

紙帳春溫春睡穩窻槐搖綠吾老矣不堪重着翠圍紅簇千古清風荆布
在一家樂事糟糠足笑杜陵憔悴漫多情須燕玉求凰意傳新曲驂鸞夢
從渠續問臨卽何賤會稽何辱畎畝豈無天下士斧斤不到山中木但莫
教風雨兩雛鳩危枝宿

景伯仁

鳳栖梧

倦客情悰紛似縷小院無人臥聽秋蟲語歸意已撓新鴈去晚涼更作瀟
瀟雨架上秋衣蠅點素冷菊戎裝尚被春花妬別有溪山容杖屨等閑不
許知人處

天香 二首

市遠人稀林深犬吠山連水村幽寂田里安閑東隣西舍准擬醉時歡適
社祈雩禱有簫鼓喧天吹擊宿雨新晴墮頭閑看露桑風麥無端晴亭暮
驛恨連年此時行役何似臨流蕭散緩衣輕幘炊黍烹雞自勞有脆綠甘
紅薦芳液夢裏春泉糟床夜滴

百歲中分流年過半塵勞繫人無盡桑柘周圍管茅佐架且喜水親山近

倦飛高鳥筭也有開枝棲穩紙帳紉衾日高睡起懶梳蓬鬢閑塔土花碧
潤緩芒屨恐傷蝸蚓倒掩衡門空解草玄誰信俗駕輕雲易散賴獨有蓬
峰破孤悶世事悠悠從教莫問

宗室文卿

從郁字文卿本名瑀字子玉衛紹王改賜焉父金紫公有中庸集文卿以
父任充符寶章宗試一日百篇賜弟朝廷經略西蜀宗室綱遣太尉中孚
之子公輔說吳曦稱藩文卿私謂梁經父言誘人以叛豈有天下者所宜
爲其後蜀事竟不成識者稱焉仕至安肅刺史

西江月 題邯鄲王化呂仙翁祠堂

壁斷何人舊宇爐寒隔歲殘香洞天人去海茫茫玩世僊翁已往西日長
安道遠春風趙國臺荒行人誰不悟黃糧依舊紅塵陌上

高仲常

梅花引

蒿火目藜羹腹書生寧有封侯骨長須奴下澤車艱險阻誰教涉畏途
半生落漠長安道一事無成雙鬢老南轅胡北轅吳功名富貴情知不可

中州詞

十四

圖槐安夢鼓笛弄馳驟百年塵一闕陶淵明張季鷹一盃濁酒焉知身後
名有溪可漁林可繳須信在家貧也樂熊門春淇江雲幾時作箇山間林
下人

貧也樂 一將進酒二

城下路淒風露令人犁田昔人墓岸頭沙帶蒹葭漫漫昔時流水今人家
黃埃赤日長安道倦客無將漿馬無草開函閉函閉千古如何不見一人
開六國擾三秦掃初謂商山遺四老馳單車致緘書裂荷焚艾接武曳長
裾高陽真得孟中趣身到醉鄉安穩處生忘形死忘名二豪侍側劉伶初
未醒

王予可

小重山 予可自解麴霜脂粉也

寶榭簾鉤捲月窻縷衣金樣褪沈餘香卿卿榮耀寵恩光三竿日顰翠楚
山長螺髻憂浮觴鳳奩塵整恨浥麴霜賣珠樓外串離腸春殘夢今夜擬
高唐

生查子

夜色明河靜好風來千里水殿謫仙人皓齒清歌起前聲金竿中後聲銀
河底一夜嶺頭雲遶遍樓前水

長相思

風煖時雨晴時熏褶羅衣人未歸螭蟻愁欲飛枕瓊霞瑣窻紗簾月樓空
燕子家春風掃落花

王監使正之

梅花引

山之麓河之曲一灣秀色盤虛谷水溶溶雨濛濛有人行李蕭蕭落葉中
人家籬落炊煙濕天外雲峯迷淡碧野雲昏失前村溪橋路滑平沙沒舊
痕丹楓下瀟湘夜橫披省見王維畫畫無聲恁經營何如幻我清寒此道
行馬頭風急催行色疑是山靈嫌俗客釣魚磯綠蓑衣有人坐弄滄浪猶
未歸

趙內翰子充

南歌子

澗草萋萋綠林鷺馬恰恰啼汀沙過雨便無泥喚得芒鞋隨意到前溪浦漱

中州詞

十五

渾堪畫雲烟總是題江湖老伴一蓑衣真箇斜風細雨不須歸

虞美人

同孟利器尋春

春來日日風成陣桃李飄零盡樹頭樹底覓殘紅只有郭西梨雪照晴空
酬春須得如川酒酒債尋常有葛巾歌側倩人扶大似浣花溪上醉騎驢

孟內翰友之

菩薩蠻回文

睡驚秋近鳴蟲砌蒼鬢慘勻霜影孤燈翳冷長歎浩歌狂

張太尉信甫

信甫名中孚世為安定望族初以父任知寧環鎮戎三州天會中宋亂渭
帥劉錡遁走諸將推信甫攝帥事時左副元帥軍已次宮池信甫乃詣行
營約衣冠禮樂無變宋舊則當送款從之即日事定授鎮洮軍節度使兼
經原經略安撫使改陝西諸路節制使及地入於宋信甫留臨安皇統中
理索北歸就拜行臺兵部尚書天德二年叅知政事貞元初新都城遷尚
書左丞以病乞身出為濟南尹改南京留守未幾薨弟忠彥字才甫歸
國授招撫使世宗朝終於吏部尚書信甫昆弟天性友愛起行陣間而文

雅俱有可稱信甫自號長谷老人才甫季弟某義谷有三谷集傳於家

慕山溪

山河百二白古關中好壯歲喜功名擁征鞍彫裘繡帽時移事改萍梗落江吳聽楚語厭蠻歌往事知多少蒼顏白髮故里欣重到老馬省曾行也頻嘶冷烟殘照終南山色不改舊時青長安道一回來須信一回老

王玄佐

賢佐一字玄佐名澮咸平人爲人沉默寡欲邃於易學若有神授之又通星曆緯讖之學明昌初德行才能召至京師命以官不拜朝廷重其人授信州教授未幾自免去再授博州教授郡守以下皆師尊之一日守澮客適中使至中使漠然少年重賢佐名強之酒守從旁救之曰王先生不如葷酒勿苦之也中使乃止是夕賢佐棄官遁歸鄉里宣宗即位聞其名議驛召之以道梗不果車駕南渡人有自咸平來者說賢佐年六十餘起居如少壯人宣宗重其人常以字呼遣王曼卿授遼東宣撫使不拜又詔宰相以書招之云阻奉仙標渴思道論敬佇下風瞻系何極先生嘉遜林藪脫屣浮榮究大易之盈虛洞玄象之終始道尊德重名動天朝推其緒餘

中州詞

十一

足利天下然君子之道出處語默何常之有或拂衣而長往或濡跡以拯時故當其無事則采薇山阿餌木石岫固其宜矣及多難之際社稷傾危而不顧蒼生倒懸而不解其自爲謀則善矣仁人之心固如是乎某等猥以不才謬膺重任四郊多壘各將誰執徒積慙汗坐視何益日夜以思庶幾得明利害而外爵祿者在天子左右同濟太平今聖上明發不寐軫念元元屈已下賢尊師重道歎先生之絕識仰先生之高風雖黃帝尊廣成之道唐虞重顓陽之節不是過也先生懷寶遺世如某輩之不肖固在所棄獨不念累世祖宗之基業億兆生靈之性命忍忘之耶昔商岩四老定儲嗣而暨來東山謝安爲蒼生而一起今安危大計非特定儲之勢也強敵侵逼又非東晉之時也生民塗炭亦已極矣豈先生建策於明昌之初獨無一言於貞祐之日乎想先生幡然而改惠然而來審定大計轉危爲安然後披蕙幌拂雲帙未爲晚耳敬聽車音某雖不肖請擁篲而先之書達竟不至遼東破時年九十餘矣

洞仙歌 賦榛實屏山所錄

圓剛定質混物非九類仁處其中靜忘意任蝶蜂狂遠燕雀喧爭心君正

惟取清白自治黃衣從淡泊此箇家風異偶合陰陽棄神智怕旁人冷眼
嫌太孤高樽俎地聊許松梧同器待他日山林不相容請援手仙葩要充
仙贊混物作渾物

趙愚軒宜之

行香子 三首

鏡裏流年綠髮華顛謝西山青眼依然人生安用利鎖名纏似燕營巢蜂
課蜜蟻爭羶詞苑群仙場屋諸賢看文章大筆如椽閑人書冊且枕頭眠
有洗心經傳燈錄坐忘篇

流倒無聞坐慣家貧眼昏花心口猶存人皆笑我我儘教人拚醉吟風閑
釣月困眠雲邂逅交親語款情真且相從莫浪辛勤西山歸隱不用移文
看菊成叢松結子竹生孫

山擁垣墻水蒲溪塘幾人家籬落斜陽又還夏也一霎人忙正稻分畦蠶
卸簇麥登場老子徜徉閑日偏長鬢髮只管尋涼綠陰何處旋旋移床
有道邊槐門外柳舍南桑

先東岩君

中州詞

八十七

好事近 次蔡丞相韻首倡及高子文屬和附于此

夢破打門聲有客袖携團月喚起玉川高興煮松簷晴雪蓬萊千古一清
風人境兩超絕覺我胸中黃卷被春雲香徹

天上賜金奩不減壑源三月午筵春風纖手看一時如雪幽人只慣茂林
前松風聽清絕無奈十年黃卷向枯腸搜徹 蔡丞相

誰打玉川門白絹斜封團月晴日小窻活火響一壺春雪可伶桑筍一生
顛文字更清絕直擬駕風歸去把三山登徹 高子文

折治中元禮

元禮字安上世為麟撫經略使父定遠僑居於忻遂占籍焉明昌五年兩
科擢弟學問該洽為文有法度仕至延安治中死于葭州之難坊州有詩
云籬落層層景軒窻面面山至其處知為工也

望海潮 從軍舟中作

地雄河岳疆分韓晉潼關高壓秦頭山倚斷霞江吞絕壁野煙縈帶滄洲
虎旆擁貔貅看陣雲截岸霜氣橫秋千雉嚴城五更殘角月如鉤西風曉入
貂裘恨儒冠誤我却羨兜鍪六郡少年三明老將賀蘭烽火新收天外岳

蓮樓想斷雲橫曉誰識歸舟剩着黃金換酒羯鼓醉涼州

中州樂府卷終

中州詩

十八



圖書在版編目(CIP)數據

中州集/[金]元好問輯. —北京:北京圖書館出版社,
2005.12

(中華再造善本)

ISBN 7-5013-3027-1

I. 中… II. 元… III. 古典詩歌—作品集—中國—全
代 IV. I222.746

中國版本圖書館CIP數據核字(2005)第136171號

ISBN 7-5013-3027-1



9 787501 330270 >

書名 中州集(全六冊)
著者 [金]元好問 輯

出版 北京圖書館出版社(100034 北京市西城區文津街七號)
發行 Tel:(010)66151313 Fax:(010)66174391

E-mail: Bishb@nlc.gov.cn

Website: www.nlcpress.com

造紙 華寶齋

印刷 杭州富陽古籍印刷廠

開本 八

印張 八五·二五

版次 二〇〇五年十二月第一版第一次印刷

印數 一·一〇〇

書號 ISBN 7-5013-3027-1 / K·1304
定價 二七三〇圓

